

84 КОМИ
К59

Елена Козлова

ШУНДЫР



СЫКТЫВКАР
2007

44-89-08

**КОНТРОЛЬНЫЙ ЛИСТОК
СРОКОВ ВОЗВРАТА**

**КНИГА ДОЛЖНА БЫТЬ
ВОЗВРАЩЕНА НЕ ПОЗЖЕ
УКАЗАННОГО СРОКА**

Колич. пред. выдач.

~~3.04.08~~

~~25.07.08~~

07.03.15

12/08/14

11

84 коми
К 59

ЕЛЕНА КОЗЛОВА

ШУНДЫР



Издательство «АНБУР»

Сыктывкар

2007

395877

НАЦИОНАЛЬНАЯ ДЕТСКАЯ

84(2Рос=Коми)

К59

Серпасалис А.Б. Минченкова

Козлова Е.В.

К59 Шундыр: повесът, висьтъяс, мойд.— Сыктыв-
кар: ООО «Анбур», 2007.— 88 л. б., илл.

ISBN 5-7555-0887-9

Елена Козловалөн «Шундыр» нима небөгын виль ногөн вос-
сьоны челядълөн этшыс да сямыс.

«Вова да мукөд» повесътын том лыддысысь тöдмасыс сизим
арöса зонкакөд, кодi воöма овны гожöм кежлö сиктö ыджыд мамыс
ордö.

«Шундыр» мойд ичöтик шань сьөлöма зонка йылысь, кодi
быдөнлы дась сетны отсöг.

Небөгö пыртöм гижөдъясын геройясыс туялöны-тöдмалöны
олöмсö, велөдчöны ёртасыны да пыдди пуктыны матысса йöзöс.

84(2Рос=Коми)

© Козлова Е.В., 2007

© Минченкова А.Б., оформление, 2007

© Осипов В.Б., дизайн обложки, 2007

© ООО «Анбур», 2007

ISBN 5-7555-0887-9



ВОВА ДА МУКӨД

Повесът

Ыджыд мам ордө

Вова олө карын. Сылы сизим арөс. Локтан ар школаө мунас. Но кор на сійө кадыс воас! Гажтөм сылы гортас, бать-мамыслөн өтка пины. Гөгөр чачаяс, эм весиг батарейкаа танк, ачыс ветлөдлө. Но и дона чачаыс оз ышөд ворсны зонкаөс. Медся нин гажтөм шойччан лунъясө, кор садикө оз ветлы.

И со — нимкодъыс ортсө вөзйысьө: батыс сиктө лэччөм йылысь юөртис. Вовалөн ыджыд мамыс сәні олө. Карыд, дерт, кар и эм: асфальта шылыд туйяс, уна сикас мороженөй, «Детскөй мирө» мамыскөд пыралас — ставыс вунлө. Но и сиктад гажа: ыджыд мамыслөн вылын өшиньяса керка, дінтіыс сөдз шор визувтө — дзесылас веж турун пөвстас, а улынджык, видзөдан да, бара нин мыччысьөма. И сөльгө, сөльгө. Ылынджык парма вөр лөзалө. Тюлю-букаяс пө сәні олөны, ыджыд

мамыс шулө. Вова сөмын серөктө та вылө: ош, руч, көин — да; а тюлю-букаясыд сөмын мойдын да телевизорын.

Воисны батыскөд сиктө. Сулаліс онялан жар лунъяса гожом. Керка гөгөрыс мича дзоридзьяса веж турун пуритө-быдмө. Батыс сёрнитыштіс ыджыд мамыскөд, тапкөдыштіс Воваөс мышкөдыс да бөр исковтіс карө. Уджыс пө уна.

— Аттө, Вова, со өд нимкодьсө вайин — бара на абу өтнамөн, — вашъяліс-варовитіс ыджыд мамыс. — На со, медся пушыд көвдумсө, аски чөскыд блин джажга выйөн, кусняв пель сайөдзыд. Эн на вунөд көрсө?

И овмөдчис Вова ыджыд мамыс ордын. Лунтыр сы гөгөр бергалө. Чеччас ыджыд мамыс водза-водз, юкталас, лысьтас да лэдзас йирсыны көзаясөс, ломтас пач, пөжасяс. Шондіс вылын нин югвидзө, садьмас и Вова. Петас ывлаө, а сәні курөгъяс котсөны, на костын вылын сорса петук тшапа ветлөдлө. Ыджыд мамыс пырысьтөмпыр и чепөсьяс:

— Садьмин, донаөй, садьмин, гулюөй. Мыссьы, сөйышт.

Пырасны. Чуткылас Вова пөсь выйө гоз-мөд блин, юас блинъяснас стөкан йөв, и пөт нин. Ошиньө видзөдө. А ыджыд мамыс ассьыс дольө:

— Сөй да мөдам. Кывлін: гажтөм кө — уджө кутчысь. Талун мог эм — давьөдз кайлыны. Ноко, төдмав: чукульө-мукульө му гөгөр гөгөртас, яг дорө нюжөдчас... Мый тайө?

— Туй? — Вова чукуыртө кымөссө да сөдз лөз синъяснас юасяна видзөдө ыджыд мамыс вылө.

— А вот и эн төд. Тайө потшөс — сы пөлөн и мөдөдчам. Корөсь чегйыштам. Гожөмбыд ковмас корөсьтө ваявны көзукъясыдлы, төвбыд кежлө дасьтыны. Воам бөр да лук чольсйөдлам-киськалам. Рытланьыс нин. А давъяс, төдан, коді олө?

— Бара шуан: «тюлю-бука».

Ыджыд мамыс серөктіс:

— Өні тюлю-бука оз нин тан ов, лөгасьөма да пышйөма, но кодкө олө на... Висьталөны.

— Қоді?

— Кузьыс.

— Коді сійө?

— О-о, сійө? Рытнас висьтала.

Пөрысь да ичөт тәрмасьтөг осьлалісны потшөс пөлөн.

— Нөшта өти нөдкыв,— шыасьө ыджыд мам.— Чу-кыль-мукыль, кытчө мөдін?— Мый тән дела, шырөм юр.

Мый дыра юрсө жугліс Вова, но эз вермы төдмавны. Ыджыд мамыслы и лои висьтавны:

— Шырөм юрыс — ытшкөм видз, а чукуль-му-кыльыс — шор, со и сёрнитөны найө. А тэ, Вова, сюся гөгөр видзөд. Қывзысь. Вөр-ваыд өд ловъя. Сійө мор-тыдлысь ловсө личөдө, сьөлөмсө бурмөдө.

— Өтнадлы, ыджыд мам, тэныд гажтөм да быд-торйыс и волө юрад.

— Абу дзик өтнам ме.

— Ме шуа, менам вотөдз вөлін.

— И сэки эг вөв өтнам. Да и өні, миянысь кындзи, олысьяс эмөсь: курөгъяс, көзаяс, кань. Войнас, эн өмөй кывлы, шыръяс гиджгөдчөны гөбөчын. Пакөститчөны.

Чөскыд узян ун вөснаыс Вова эз кывлы некутшөм гиджгөм.

— Ыджыд мам, ме нинөм дзик эг кывлы.

— Менам унмөй кокныыд да ставсө кыла. Вот эськө босьтін да кыйин найөс. Пызь мешөк розьөдөмны. Да өд и картупельсө весиг йирөны.

— Ме кыя?

— Абу өмөй тэ айулов?

Вова көсйө вөлі юавны, көнөсь сылөн колян вося ча-чаясыс. Куим гөгыля машина вөлі да өні оз тыдав. Но

«айулов» йывсьыд кылөм бөрын та йылысь яндзим нин лои гарыштнысө.

— А каньыд нө?

— Пөрысь да оз нин кыйсьы. Дышмис. Колө вот каньпиөс вайөдны да быдтыны.

Гөгөр сьылісны лэбачьяс, но Вова найөс эз кывзы — юрас бергалісны пакөститчысь шыръяс йылысь мөвпъяс. Öд лысьтөмаөсь пызь мешөк розьөдны.

Дэльдчөм

Корось нөб лэччөдөм да пажнайтөм бөрын ыджыд мамыс водіс шойччыштны. А Вова аддзис колян वोся мач да ывлаө петіс ворсны.

Медводдза мортөн, кодкөд аддзысис Вова, вөлі Паладь пөч. Сійө воысис ыджыд мамыскөд, да и лунвылө өшиньяса керкаясыс сулалісны шор дор мозыс орччөн. Паладьыслөн — увланьынджык. Ыджыд мамсянныс кывліс: сьөкыд пеля пө. Паладь пөч сулаліс аслас йөрас — веськөдіс коссө — ёг турун град вывсьыс нетшкө.

— Но, Вова воөма. Мися, коді нө тайө мачасьысьыс?

— Видза олан, Паладь пөч!— шыасис зонка.

— Видза, видза!— сэсся чөв олыштіс да серөктөмөн содтіс:— Вова ыджыд мача да дөмаса гача.

— Некутшөм дөмас абу менам гачын... Выль на весиг. Джинсы гач.

— Абу тай. Бөрад нө мый, гөрд вурысөн дөмас шняпкөмаөсь. Вова ыджыд мача да дөмаса гача.

— Көні?— Вова весиг мачасьнысө дугдіс. Вежыньтчис став тушанас, мед бөрсянныс гачсө видзөдлыны.— Некөн некутшөм дөмас абу.

— А ме шуа: выйим. Вова ыджыд мача да дөмаса гача.

— Да тэ ачылд... Тэ ачылд Гаддя Паладь.— Вова тōдіс: сиктсаясыс Паладь пōчсō Гаддя Паладьōн шуōны, вод-дза волігъясас на кывліс. Но зонка ёна дōзмис сы вылō воōмысь да тадзи нимтысьōмыс сылы этша на кажит-чис, сійō нōшта на кызкō кōсйис дойдны пōчōс:

— Чукля кока Гаддя Паладь!— артмис сылōн. Коксō эськō Паладьыслысь Вова некор эз аддзыв, кузь юбка новлō да, но скōрйивсьыд тадз горōдсис.

Пōч вōлі мышкыртчōма нин град дорас да эз и воча-видз Вовалы. Гашкō, эз и кывлы, сьōкыд пеля да.

Мачōн ворсны Вова сэсся эз и вермы — сэтчōдз дōзмōма. Гортас пырис да элясис ыджыд мамыслы:

— Шу мыйкō Паладь пōчыслы.

— Шōвктугйōй, гулюйōй,— меліа шыясис ыджыд мамыс да шылькнитіс Вовалысь юрсисō.— Эн лōгась. Паладь пōч од шмонитō сідзи. Сылы од гажтōм жō. Да и шулі тай, омōля кылō сійō. Унаōн на тэнō мōдласны и дэльōдны, и дзерōдны, а шмоньсō колō гōгōрвоны, да аслыд тшōтш кужны шмонитны. А казяласны кō, мый тэ скōрман, ёнджыка на мōдасны дэльōдны. Он кō скōрмы, регыд эновтчасны, оз кōлась нимтысян кывйис.

Ыджыд мамыслōн шань шуалōмыс лōньōдіс ыззылōм зонкаōс. Вова бōр петіс ывлаō, син гугнас видзōдліс Паладь пōч йōрō, но сэнī некод нин эз тыдав. Босьтис эновтлōм мачсō да мōдіс шыблавны керка стенō, бōр кутавны да артавны, кытчōдз оз сорсьы: оти, кык, куим...

Петіс ведраясōн ыджыд мамыс.

— Пывсям талун, ва катла пōртъясас.

Вова котōртіс сы бōрся. Ичōтик пывсяныс куткыртчōма дзик шорбокса кыркōтш дорас. Васō пывсянас катывлісны шорысь, сэнī пō небыдджык.

Вова тшōтш корис ведра да лэчис горулас. Шорсō пывсян весьтōдыс кодйыштōма, паськōдōма, гōптас ваыс тырōдз чукōрмōма. Шорас сōдз юкмōс. Берегысь берегō

паськыд пөв шыбитөма. Пос. Тані жө ыджыд мамыс и пожъясълывліс. Шор дор мозыс ляк бадь быдмис, мөдара рас төзь дзордзаліс, чөскыд өгурчи көр гөвкъяліс гөгөрас, а вылынджык коз пуяс тыдалісны. Гажаа сөльгө шорыс, быттө Воваөс ворсны корө.

Но зонкалы өні некор. Сійө көшөн лөдіс ведрө ва, медводз ыджыд мамыслы, сылы джынсьыс унджык, сөсся аслыс — этшаджык. Тадзи ыджыд мамыс тшөктіс.

— Зэв сьөкыд кыр вочатө,— элясис Вова джын туяс.

— Миянлы өд кыкыдлы уна ва оз ков. Нөшта өтчид-мөдысь лэччылам, и тырмас.

Вова бөрыннас дыр мөвпаліс, кыдзи эськө кокньөдны ва ваялөмсө, кыдзи вөчны, мед ваыс ачыс пывсянас каяс. Но юрас сідз нинөм эз и во.

Шыр кыйөм

Ыджыд мамыслысь шыр кыйөм йылысь коркөя сөрнисө Вова эз вунөд. Да и кань вылас элясьөмыс, пөрысь пө да дышөдчө, оз нин кыйсьы, вежөрас коли.

Шынь-шынь гөгөртис Вова ыджыд мамыслысь овмөссө: йирк выв и гөбөч, посводз и сайник. Йирк вывсьыс и сюри сылы пөвтор вылө тувъялөм, чорыд сутугаысь кыйөм садөк. Лэччөдіс аддзөмторсө посводзас, весалыштіс сімсө, бус-няйтсө. Пытшкас нянь тор да сыр чир пуктыштіс, октіс-каличаліс пружинаа өдзөссө, катөдіс капкансө пөсйылө да пызь мешөк дорас и пуктіс. Рытнас, узыны водөм водзвылас, видзөдліс, да вөрзьөдтөм на вөлі самыс.

Мөд луннас Вова муртса восьтіс синсө, пыр и воис юрас кыйсян көлуйыс... Звирк чеччис. Ывлаыс югыд, шондіа. Ыджыд мамыс абу гортас, буракө, град йөрас. Пасьтасьтөг и мыссьытөг котөртис пөсйылас. Шедөма шырыд! Пырөма да самсө вөрзьөдөма, каличыс чеччыш-

тoма да ён пружинаа садок одзoсыс и пoдлассьoма. Котралo шырыс садок пытштiыс. Воваoс аддзис да нoшта на тeрыбджыка мoдiс визлавны. Зонка бoсьтiс садoксo да петiс ывлаo. Шoндi югыдсьыс, буракo, шырпийд повзис да дурпоп моз кутiс бергавны, сeсья шыблaсьны oтарoмoдарo oдъялi. Недыр мысти мудзис да лoнис, куткырчис ылi пельoсac. Сeтшoм мичаник шырыс, рудiник, бoжыс кузь да вoсньыдик, синъясыс пoсни сьoд чутiкъясoн югъялoны.

«Мый нo сeсья oнi, вины тайoс колo? Ыджыд мам абу гортын, ачым ог куж, да ог и лысьт. Лeпта кo садок oдзoссo — пышъяс. Колo либo каньoс дiнас пуксьoдны, мед петiгкoстiыс тшапнитac», — мoвпалo Вова.

Ичoтик шырыс зонкалы жаль лoис.

«Лeдзны? Но мыйла нo, сiдзкo, и кыйис? Ыджыд мамыс бара Мурo каньoс мoдac дoжнавны, мый пo тeысь бурис, йoв лaкан да шoндi водзын сoмын куткырвидзан, синтo куньтыралiг. Сeсья нем тeысь. Воваoс на oшкас, co пo тe пыдди сылы лoo шыртo кыйны».

Мурo каньыс некoн эз тыдав. «Кыдз нo сeсья шырco вины? Изйoн юрас камгыны?» Ёна ыджыда ышловзис Вова. Сeсья бoсьтiс киас капканcо да мoдoдчис шор горув.

Векньыдик туйoд лeччис пивсян дoрoдз, сeсья водзлaняс туйыс вожалo — веськыдaсo шор дoрас лeччo, а шуйгавывлaньыс — Паладь пoч керка дoрo кeжo. Шуйгавылac и кeжис Вова, пуктiс садoксo эжа ылo, лeптiс чорыд сyтугaa oдзoссo, ачыс вeшйис. Шырыд дыркодъ на чoв пукaлiс, сeсья исасигтыр матыстчис вoсьсаинас да вoськовтiс турун пio. Здук сулалыштiс, бергoдчылис на, збыль али мый нo вoля ылын? Синъясыс пoлoмoн югнитлисны зонка ылo, и сoмын вирдыштiс, воши турун пiас. Жаль на и лoи Вoвалы сeсья, мыйла и лeдзис, пoзис и садoкас гортac видзны. Вова бoр катiс капканcо гортac да пуктiс йирк ылo, вaжинас. Мед сeсья мукoд

шырсö кань кыйö, Мурöйс. А пызсö, дерт, кытчöкö шыръяс судзтöминö ковмас инавны.

Рытнас Вова ыджыд мамыслы висьталіс шыр кыйöмсö да сійö швуч-швачкерис кинас:

— Эн жö öд лэдз?

— Мед олö,— лабутнöя вочавидзис Вова.— Паладь пöчыдлөн матынджык керкаыс, да сэтчö, көнкö, муніс. Ми ордö оз нин лок.— Ачыс мөвпыштіс: «Мед Паладь пöчыс оз нерсы дай».

Мöс видзöм

Талун Воваясö асывсянъыс гöстя воис, сусед Макар Ивöлөн Ия нылыс. Зэв визув да варов. Вова сы тельгöм улö и садъмис.

— Мамъяс лöсьöдчöны нин видз вылö петны турун пуктыны. Ми Лидакöд асьным мöдам горт овны. Öд ыджыдöсь нин. Лида весиг пусыны кужö. А ме джодж чышкывывла да тасьті-пань мыськавывла.

— Отсасьсысяс нин мам-батыдлөн,— ошкыштіс ыджыд мамыс.

Вова бергöдчис стенлань: кор нин мунас. Нывка дырйиыд абу и лöсьыд чеччынысö. Но, кылö, ыджыд мамыс чукöстіс нывкаöс чай юны. Сідзкö, быть ковмас сувтны, удзöдасны. Зонка чеччис, пасьтасис, идраліс-лöсьöдіс узыланінсö, эз эськö сэтшöм пелька и артмы, кызди ыджыд мамыслөн, но туяна. Петіс мыссыны.

— Воöмыд, Вова, а он и петкöдчыв. Ме тэнö ворсны виччыся,— ыджыд сьöд синъяснас Ия дзоргис зонка вылö. Вова нинöм эз шу, да, гашкö, та вöсна Ия мöдіс öдйö лапйöдлыны синлапъяснас, кузь сук синлысьясыс быттьö лэбач бордъяс. Сэссия раммыштöмөн нин выльысь юаліс:

— Тэ ворсан мекöд?

— Мыйысь?— юалöм вылö юаліс Вова.

— Чомйысь ворсам. Бать миянлы пөвйысь чом вөчис.

— Кутшөм нөшта чом?— дөзмөмпырысь нурбыльтіс Вова. Сылы эз вөв окота мунны кытчөкө гортсьыс да нөшта нывкакөд.

— Чайсө юышт рыська шаньганас да ветлы, видзөдлы,— ышөдіс ыджыд мамыс.

Чай юигчөж тельөдчис вөсни гөлөснас Ия. Став сиктса вьльторсө висьталіс.


«Лунтыр кө такөд өтлаын — пельыд сьөдмас»,— ас кежсьыс мөвпыштіс Вова. Ачыс сійө эз вөв вьвті варов. Коланасө висьталас-юалас, а ковтөг кывсө оз пес. Шыасясны кө сы дорө — лабутнөя вочавидзас мортыслы синмас видзөдөмөн. Абу зумыш зонка, зэв на и осьса видзөдласа.

Нуръясьыштөм бөрын челядь лэччисны кыр горув Макар Ивө керка дорө. Керкаыс вьль да зумьд, неважөн на олөны. Гөгөрыс эжа вежөдө. Некымын нэриник пу өшинь улас: пелысь да льөм, вьльөн пуктөм сэтөр кустьяс.

Керка дорас матын пөвйысь вөчөм ичөтик пелькиник чом, өшиня и өдзөса. Иялөн кужысь киа батыс, уджач и. Нывъясыслы ворсанін лөсьөдөма. Чомъяс и вөлі тільгуныслөн ыджыдджык чойыс, Лида — кузиник да вөсньыдик нюдз бадь кодь нывка. Латшкөсіник Вовакөд орччөн сувтіс да юрөн пөшти ыджыдджык. Кыдзи му да енэжыс торъялөны, сідзи и кык чой. Лида шабді рөма юрсия да лөз синма. Синлысьясыс кузьөсь жө, Иялөн моз, но еджговөсь да оз өна тыдавны. Чөв олысьджык Лидаыс да ньөжмыдджык. А Ия инас оз өшйы, потшөс вылас нин кайөма, коксө потшьяс костас суйөма да увань юрөн өшалө.

— Ой-ой-ой! Сэтшөм ті тешкодьөсь,— гигзьө сійө.

— Энлы, Ия, вай сёрнитчам,— вөзйө Лида.— Чомйысь ворсам. Ме лоа мам, Вова — бать, а тэ — миян ныв. Ворсан, Вова?— юалө сійө.



— Ворса,— вочавидзö зонка. Мый нö сэсса, оз öд ыдждöдчы, локтис нин да.

— Лок либö сёйышт да мös видзны сэсса мун.

Вова бура дыр видзöдалис чомсö, кызди вöчöма ныв-каяслöн батыс. Нинöм сьöкыдыс и абу. Нель сюръя сувтöдöма, улитыс и вылитыс тувъявлöма пöвъясөн, сюръяяссö йитöма, а стенъяссö сувтсөн тувъявлöм пöвторыасыс вöчöма. Пытшкөссö нывкаяс асьныс нин мичмöдöмаöсь: шпалер торъясөн кышöмаöсь, картинаяс öшлöмаöсь, öшиняс — тюль, вышивайтöм дöра, рöмпöштан, дзоридзьяса ичöтик ваза пызантор вылын сулалö. Ортсысянныс и пытшкөссиянныс пельк да гажа чомйыс.

Воваöс гөститöдисны сёйыс пöжалöм пирöгөн. Сэсса ыстисны ю дорö мös видзны.

Эз эськö Вовалы окота вöv öтнаслы вадорас лэччынысö, но кöсйысис ворсны да быть кывзыс. Тöдлас кö ыджыд мамыс юасьтöг ю дорас лэччылöмсö, мый на и шуас.

Киас ньөр, шутөвтлас да швичнитлас, быттьö мösъясöс луд вылö вöтлö. Макар Ивö керкасянь увланыс абу и стрöйтчылöмаöсь. Борти лэччыштан да юдорса кыр йылö и воан: улиас паськыд ота лыа, а водзынджык и юыс визувтö. Лыа вылөдзыс эз и лэччы Вова, мösъяссö öд веж видз вылын йирсьöдöны. «Асьныс кынöмпöтсö кор-сясны»,— мөвпыштитис Вова да пуксис кыр йылас. Ю вылас видзöдиг, казтыштитис батысö да мамсö. Кор найö воласны, быть ю дорас лэччöдлас, пöттöдз сэки Вова купайтчас. А öтнаслы ыджыд мамыс оз тшöкты, вöйöмысь полö. Да Вова оз и лэччы, кывзысьö.

— Володюш!— кылис сийö мелиа шыасьöм.

— Коди тайö?— Вова звирк чеччыштитис да бергöдчис. Некод эз тыдав. Сöмын веськыдвылас öтка пашкыр бадь дөввидзис.

— Володюш!— öни стöча нин гөгөрвоис зонка, мый бадьладорсянныс и кылö гөлöсыс.

«Менө али мый чуксалөны?— Вова бергөдчыліс, гөгөр видзөдліс — некөн некод сэссия эз тыдав.— Менө тадзсө чуксалөны? Но таөдз өд сэтшөм меліасө некод на эз шыасьлы».

Бадь куст сайсянь мыччысис Лида, киас тубраса.

— Ме тэныд сёйны вайи,— шуис сійө. Матыстчис да пуксис орччөн. Вольсалис эжа вылө вышивайтөм пызан-дөра. Пуктіс эз нин сёй пирөгъяс, а чөскыд көра нянь чөлпан, өгурец, лук, пуөм кольк, йөв сулея.

— Сёй!

Вовалөн и збыль кынөмыс сюмалөма. Мөдіс солө тшуклавны лук да нянь сорөн азыма няклявны.

— Тэ тшөтш,— нывкаөс сыөн жө вайөм сёянөн гөститөдіс Вова.

Лида эз жө мөд пыксьыны.

— Ияыд нө көні?— юалис зонка.

— Водтөді узыны.

Сёйыштөм бөрад гажаджык лои. Да нөшта кыкөн-над. Оз тусъяс корсялыштисны кыр дор мозыс, сэссия вор-сігтыръя и коли кадыс. Чом дінас воөм бөрын дыр ков-мис корсьны Ияөс. Тюрөдөма конюшня дорөдз, сәні нин отсасьө Ёгор дядьлы конюшня весавны: вөвъяссө вуджө-дөмаөсь мөдлапөлө видзьяс вылө. Визув нывкатө гортад он пукөд, быдлаө вевъялө. Отсаси пө Ёгор дядьлы, бөрын-нас ошйысис. Бергалис, көнкө, сы гөгөр, кутшөм сэссия сысянь, ичөт мортсянь, отсөг.

Рытнас, ыджыд мам ордас водөм бөрас нин, Вовалы уси дум вылас сійөс меліа чуксалөмыс:

— Володюш!

Сійө шудаа нюмъөвтіс да чужөм вылас нюмпасөн и унмовсис. И вөтъясыс сылөн вөліны югыдөсь да сөстөмөсь.

Чиганъяс

Асывсяньыс Ия ышки-пошки воис.

— Вова, чиганъяс локтоны!— и водзö тöвзис.

Зоңка энoвтис вöласьöмсö, аслыс сабля вöли вöчö, да весиг вöлалöм чагсö улыс кильчö вывсьыс идравтöг, котöртис шор кыр йылö. Сэтысянь бура тыдаліс, кызди шор мöдарсяньыс шорсö вомöналысь пос вылö öта-мöд бöрсяыс лэччисны вöла-доддя чиганъяс. Корскысь вöвъяс-нас веськöдлісны чим съöd юрсиа айуловыс, таран-тасъясас пукалісны уна рöма дзоридза юбкаяса да коска жакетъяса сэтшöм жö смоль съöd юрсиа чиганкаяс, посни и гырысьджык челядь, кöрöба додь тырыс нопъяс — овмöсныс. Нель вöла арталіс Вова.

Сиктö пырысь чиганъясöс видзöдлöм бöрын Вова бара бoсьтчис вöласьны. Саблянас сэся мöдас вермасьны гундыръяскöд, кодъяс, дерт, олісны-дзeбсясисны гидсайса петшöрын. Йылыс сабляыслөн лöсьыд артмис, ёсь. Воропыс эзджык на эшты, кывсö нюжöдöмөн буретш зіля вöласис, кор дзиръя дорö матыстчисны кык чиганка да накöд ар куима зонка.

— Мам-батыд гортынöсь?— юалöны комиөн.

— Абу.

Öдйö и пырисны чиганкаясыд йөрö, варовöсь, збойöсь.

— Тэ тай зэв шань зонка. Няньтö миянлы петкöдышт.

— Ме ог тöд,— шай-паймуні Вова,— ыджыд мам абу гортын да.

— Вай öти нянь, ме тэныд вугыр сета,— шуис томджык чиганкаыс, коді кутіс киöдыс мугов чужöма да ыджыд съöd синма ичöтик зонкаöс.

Вовалы вугырыд ёна колö. Зэв окота аслыс нин видлыны чери кыйны.

— Но,— гогнитіс Вова юрнас да пырис гортас. Талун ыджыд мамыс асывбыд пöжасис, керкаас век на гөвкъяліс

чөскыд нянь көрыс. Пөжалөм көвдумъяссө нянь пөв
вылын вөлі лэптөма пачдорса сөр вылө. Вылас павгөма
еджыд вышивайтөм доръяса ки чышкөд. Зонка босьтис
улөс, сувтис сэтчө да судзөдчис няньла. Сэк кості чи-
ганкаясыд пырисны керкаас. Вова мыччис чиганкалы
ыджыд банйөм көвдум, лэччис улөс вылысь да босьтис
киас еджыд дзирдөн дзирдалысь вугыр.

— На, мөдөс босьт, — вөзйө чиганкаыд. — Öтиыд öти и
эм, нетшыштчас чериыд да оз коль, няньыд со зэв на уна.

Сійө пуктис Вова ки пыдөсө мөд югъялысь ичөтик
вугыр да ачыс и судзөдчис няньысла.

— А со этайö вугырыс ыджыдджык, та вылө гы-
рысьджык чери сюрас, — бара вөзйө чиганкаыд.

А мөдыс, мый вермө, ошкө Воваос:

— Со өд нин сійө кутшөм ыджыд лоөма, ачыс чери
кыйны лөсьөдчө.

Вовалы нөшта ыджыдджык вугыр вөзйисны. Чиган-
каяс повтөг нин лөдісны сумкаас ыджыд мамысөн
пөжалөм няньсө.

Кор збой да ызгысь чиганкаяс петисны, Вова бара
сувтліс улөс вылас да аддзис: нянь пөвйыс вөлі куш.
Вова кабырын эзысьсөн дзирдалисны квайт вугыр.

Öні вөлисти Вова гөгөрвоис, мый неладнө артмис.
Няньыд абу. Мый нө ыджыд мамыс шуас? Сійө, гажтө-
миник да рам, петис кильчө вылө, эз ло окота сылы и
вөласьны. Эз вөв нимкодь и вугыръясысь. Довгис дзиръя
дорө: абу пөдлалөмаөсь ас бөрсяыс волысьясыс. Кали-
чаліс дзиръясө да бөр ротіктис кильчөлань. Пуксис сод
вылө. Көні нө эськө ыджыд мамыс? Мый шуас?

Ыджыд мамыс мыччисис керка сайсянь корось нөбъя.

— Кайлі вөр дорө корось чегъявны, ном-гебйыс петө-
ма кольтанөн гудравмөн. Роснас и лэччөді, тані лоө ко-
рөсявнысө, — пуксис сійө кильчө дор лабичө.

— Мыйкө тай рам талун, эн-ө чуньтө вунды вөласи-
гад? — юасьсө сійө.

— Эг,— нурбыльтіс зонка.

— Гашкө, висян да?— майшасьö ыджыд мам.

— Ог.

— Он кө, вöлалөм чагтö идрав, чышкы да чукöрт, пачводзö пырт, пач ломтіг, сотам,— велöдö сійö ичötös.

Вова öдйö и чукöртіс чагсö да, керкаас пыригмоз, бара чөвтліс синсö тыртөм нянь пөв вылө. Бөр петігас öдзöсас и люкасис ыджыд мамыскөд.

— Эн пет, чай юам небыд няньөн да вöлисти корöсьсö көртавла.

Но Вова эз кывзись, петіс посводзö. Зонкалөн то-павліс сьölөмыс: öні ыджыд мамыс аддзас тыртөм пөвсö. Мый бара лоö?

Регыд и кыліс:

— Көні нö няньыс? Кытчö нö вошöма?

Вова звирк чепösйис пösйылö, синнас гөгөртөдіс татчös овмössö: кытчö позяс дзевсьыны. Йирк вылө кайны оз нин вевъяв, сэтысь эськө ыджыд мамыс и оз аддзы. Со быд сикас эмбурыс. Вова аддзис увлань вомөн кымыньтөм тыртөм пельса, сійös лэптыштліс да сэтчö и дзумгысис.

— Нолы, көні тэ? Кытчö няньсö воштін?— петіс керкасьыс ыджыд мамыс да пösйылас и веськөдчис, буракö, кывліс пösйив öдзös шысö.

— Нолы, лэччы да висьтав, кытчö няньсö шердйин?— скöра шуаліс ыджыд мамыс. Сійö чайтіс, мый Вова йирк вылас. Содйис сэтчö эз вöv, Вова ур моз пелька кайлывліс керка пельöstыс. А ыджыд мамыс пельösөд кайнысö оз вермы, да и нинөмла сылы йирк вылассö. Мый коланаыс сылөн матынджык ки улас.

— Сюраң кө öні меным, ньөръяла,— скöраліс ыджыд мамыс.— Став нянь сеталöма. Кодös нö вердін? Öти көлөб абу кольöма. Картупель и сейны ковмас. Сюраң тэ меным. Чомъяд ворсны нуин няньсö? Лэччы! Кымынысь тэныд колö шуны,— бара горөдіс ыджыд мам.

Сэсса пуксис стöч сійö пельса вылас, кöни и куткыр-видзис Вова.

Зонка лов шысö кутöмөн ланьтöдчис путкыльтöм пельса пытшкас, öни ачыс быттö налькйö веськалöм ичöтик шыр. Шедас кö — бур оз ло.

Сэсса ыджыд мамыс дыркодь чöv олис.

— Но, лэччы нин да висьтав, кытчö няньсö лотин, гашкö, позяс на бергöдны,— небзьыштöма нин, буракö, бур ногөн шыасис. Но Вова век на чöv олис, да весиг чöскыд кампет кö корисны сейны, и сэк эськö эз пет.

Ыджыд мамыслы, буракö, дышöдис виччысьнысö, броткигтырйи пырис керкаас.

Вöлисти зонка пыдисянь ышловзис, быттö лэчкысь мыни. Петис пельса увсьыс, ёна жö дзескыд сэни куткыр-видзöмнад пукавнытö, кокъясыс весиг позялöмаöсь. Но нюжмасьнысö некор, бара на, гашкö, петас ыджыд мамыс. Вова пелька кайис керка пельсöд йирк вылö. Сэни вöляджык, и сэтысь öдвакö сийöс судзöдан.

Некымынысь на петалис ыджыд мамыс, корис Воваöс гортас, но зонка шы эз сетлы.

Рытланьыс нин кыськö ыджыд мамыс тöдмалöма, мый сиктö волöмаöсь чиганъяс, да мöдис бурөн корны Воваöс лэччыны.

— Да лок нин сейышт. Тэнö, буракö, чиганъяс ылöд-лöмаöсь. Налөн öд рöдыс сэтшöм: пöръявны да курыштны. Ерöмаканьяс.

На вылö мöдис ыджыд мамыс пинясьны, да сэк сöмын личалис сьölöмыс Вовалөн. Узьны водан кадö и лэччис Вова йирк вывсьыс.

— Сей да вод. Паладь пöчыд со сетыштіс няньсö. Асыв бара пöжася. Чиганъясыд öд ылöдлісны?

— Найö,— шöпкөдöмөн моз артмис Вовалөн.

— Но нинöм,— ышловзис ыджыд мамыс.— Мöдысь сюсьджык лоан. Мед инö корысьяслы пыдди лоö. Таысь Енмыс прöститас.

Чери кыйом

Асъядорыс нин Вова матыстчис горт дорас. Мудз. Тшыг. Но нимкодъ. Ыджыд мамыс радлыны мѳдас: сымында чери Вова кыйис. Юква вылѳ тырмас, и каньлы чѳсмасьны. Ывлаыс руд рѳмыд. Татшѳмыс овлѳ гожся войясѳ, кор шондѳыс недыр кежлѳ дзевсьылѳ вѳртас сайѳ.

Зонка котѳрѳн кайис кильчѳ вылас. Игана. Зѳркнитѳс ѳдзѳсас. Ыджыд мамыс, буракѳ, абу и водлѳма узьнысѳ, жакета да чышъяна, здук мысти и восьтѳс.

Вова нюмъѳвтѳс сылы воча да чѳла мыччис югыд пакетын кыйдѳссѳ.

— Черинад и быдѳн! — скѳра ѳвтовтѳс пакетсѳ ыджыд мамыс да бѳр крапкис ѳдзѳссѳ.

Чериыс сямунѳ кильчѳ содъяс вылѳ: кельчи да ѳкыш. Мукѳдыс вѳрисны на, ловъяѳсь.

Вова лап-лапкерис синлысъяснас: эз гѳгѳрво, мыйысь сы вылѳ скѳралѳ ыджыд мамыс. Мыйла эз босьт черисѳ? Мыйла бѳр крапкис ѳдзѳссѳ? Гашкѳ, эз сѳян чери кый да? Кузь Коля тай нѳ татшѳмѳс жѳ гортас нуис. Вова дорысь, дерт, сылѳн унджык-а.

Но сѳйѳ и ачыс ыджыд, витѳд классѳ нин вуджѳма. Сѳйѳ и чуйдѳс Воваѳс чери кыйнысѳ мунны. Кыськѳ кывлѳма, мый Вовалѳн вугырыс уна, ѳд танѳ быд юѳр ѳдѳѳ разалѳ: сикт помас несъян, а мѳдарас тѳдѳны нин. Ыджыд мамыс сѳк эз вѳв гортын, буракѳ, бара кайѳма вѳр дорѳ, юасьнысѳ некодлысь лои. Питшѳгас кѳвдум суйис, зептас вугыръяс, и петѳс гортсьыс.

Вугыр шатьсѳ сылы Коля вадорас нин и вундѳс да кырссис, вугыр суниссѳ асьыс пысалѳс. Сикт увланыс вуграсьыштѳсны, а шондѳ лѳччигас нин Коля ышѳдѳс сѳйѳс берег пѳлѳныс юкатыдса чукыль саяс ветлыны, сѳнѳ пѳ бура курчѳ чериыс. Сѳтысь медсясѳ и шедѳ.



Сэтшөма Вова нимко-
дясис. Чайтис, ыджыд ма-
мыс ошкас сійөс, малыш-
тас юрөдыс, шуас: со,
Вова нин кыйысь-вайысь
лои. А сійө...

Вовалөн лигышмуні
ки-кокыс. Эз и чукөрт че-
рисө, пуксис сод вылас.
Весиг кынөм сямалөмыс
вуні. Мыйла нө ыджыд
мамыс тадзсө? А мөдыс
нин петө тасьтiа, нюмъ-
ялө, скөр руыс разалөма.

— Пыр мун да мыс-
сьы. Шыд чөвти, сей.

Вовалөн ки-кокыс
тіраліс. Мудзысла, дерт.
И гөгөрвотөмысла.

Ыджыд мамыс мыш-
кыртчис чукөртны че-
рисө, а Вова чөла пырис
гортас.

Тіралөмыс мөдіс быр-
ны шыд тасьтiсө ректіг-
моз. Ыджыд мамыс сәні
жө, сөян пызан вылас, ке-
рис да сьөмйис чери.

— Тэ тай ыджыд нин
вөлөмыд! Та мында чери
шөдөма!— вөлисти ош-
кыштіс сійө.— А ме өд,
вошин да, мыйсө нин
юрын эг бергөдлы. Мися,
гашкө, чиганъясыд бара

волісны да тэнё нуисны, либё вадорё отнад лэччин да вöйин. Некод весиг мунёмтö абу аддзылöма. Ю дорöдз лэччылі, вөр дорöдз кайлі. Шы ни ру. Быттьö сылöмыд.

— Кузь Колякөд кыйсим. Катыдас, ю чукуль саяс.

— Петкөдла ме гаж сылы, кагаос босьтöма сы ылнаö!— бара мөдіс ярзыны ыджыд мамыс.

— Ыджыд мам, но сійö öд менö кыйсьынысö велөдіс, отнамлы эськө та мындаыс эз сюр.

— Сідз эськө, дерт, да. Зэв на öд тэ ичöt ю дорас ветлөдлынысö.

— Öні на шуин: ыджыд нин.

— Да ог нин и төд, мый татчö шуны. Дерт, уна чери кыйин да ыджыд, но юасьтөг мед эз вöv некытчö мунöма. А бужді кө берегыс да ваас тювгысин?

— Ыджыд мам, ме öд эг отнам вöv.

— Сідз эськө да. Асыв юква пуам. Со каньыд кутшöма корö, кылö чöскыдтö. Тшутшыс тэныд,— шуис ыджыд мам.

— Черинас гөститөд. Кыкөс сет, эн, куимөс. Мед чөсмасьö.

— Зэв тай небыд сьөлöма тэ, шөвктугйöй,— меліаліс ыджыд мамыс.— Сета, сета. Вай вод да узь. Көмтö пөрчы. Ва ставыс.

Гөтрасьом

Асьявылыс Воваос биаліс. Вөтын моз кылö: кодкө кымөсас көтөдөм кодзыд ки чышкөд пунктö. Сэсся кодкө юктөдö туруна чөскыдтөм дэбыд ваөн. Син пырыс руын моз вуджөртчис ыджыд мамыс, петкөдчыліс и Паладь пöч. Сэсся найö вешйисны бокö, а Вова сунтшик усьлі-унмовсьліс. Вөталіс ли, збыль сылы аслас кийс кажитчис сэтшөм кызөн да сьökыдөн ли, но Вова мый вынсьыс көсйис лэптыны кисö да эз вермы. Кокыс сэтшөм жö

кыз да сьöкыд вöлі. Бара ыджыд мамыс лэптыштліс юрсö да юкталіс курыд ваөн.

Дыр-ö та бöрын Вова узис — оз тöд. Садьмис, да Паладь пöч сы дорын пукалö.

— Но, со тай Воваыд, бур пи, синсö восьтіс, паляліс, оз нин вись, жöник.

Мыйла Паладь пöчыс сы дорын пукалö, Вова некыдз эз гөгөрво. Синнас корсьыштіс ыджыд мамсö, но эз аддзы. Абу, буракö, гортын.

— Жöник öд?— бара юаліс пöч.— Жöник!— ачыс и вочавидзис.— Тэ вай ме вылö гөтрась.

Вовалөн весиг синмыс чашкавліс татшöмтортö кылöм бöрын.

— Ог бара-й,— тэрыба бöрынтьіс зонка.

— Мыйла нö он?— небыдика сёрнитіс Паладь пöч.— Менам со кутшöм ыджыд керка, эмбурöй керка тыр, кык кöза, ыжъяс, курөгъяс, а айулов керка помын абу. Вай ми тэкöд гөтрасям. Ме ордö вуджан овнытö.

— Ме ог!— ордіс Вова.— Ыджыд мам! Ме ог! Шу мыйкö...

— Да он, дерт, он,— шыасис ыджыд мамыс, быттö мездіс пикö воём зонкаос, пукалö, вöлөм, улос вылын крöвать юр водзас.

Мед не аддзыны Паладь пöчлысь чукурöсь мугов чужöмсö да дзор юрсисö, Вова бергöдчис стенлань, льöбйыс тіралö, муртса оз бöрд. Бур, мый ыджыд мамыс дорйис.

— А код вылö нö гөтрасян?— абу на öвсьöма Паладь пöч.

Вовалы мыйлакö дум вылас уси Лида, сылөн мича лöz синъясыс, шабді кодь юрсиыс да меліа шыасьöмыс: Володюш! И зонка ас тöдлытöгыс нюммуні.

— Лида вылö.

Öні нин азыма гызнитісны-серöктісны и Паладь пöч, и ыджыд мамыс. Паладь пöчыс весиг пельпом вылас павгöм чышъян помнас чепöсйöм синвасö чышкыштіс.

На серам вылө и зонкалөн нюмыс петіс.

— Но мый сэсса, висысыыд гөтрасны нин көсйө-а. Менө верөс саяд оз босьт да гортө лоө петны, ыжъяс колө юктавны да көза лысьтыны,— вевттис чышъянөн Паладь пөч дзор юрсисө.

— Ыджыд мам, кынөмөй сюмалө.

— Вай чеччы, юкваыд тэнө виччысьө, картофеля шаньга и. Ми Паладь пөчыдкөд чөсмасим нин. ВордİM и. Чери кыйысылы сюсь син да тэрыб ки-кок, дзонь-видзалун да, мед мөдысь лыыс-сьөмыс мында чериыд сюрө.

— Кыдзи лыыс-сьөмыс мында?— эз гөгөрво Вова.

— Мыйта вайөм чериыслөн лыыс да сьөмыс, мөдысь мед сымында чери сюрө,— гөгөрвоөдіс ыджыд мамыс.

Юөр

Зэрмытөдзыс муртса вевъялісны вайны пошта. Вова сөмын босьтіс газет кудсьыс «Коми му», мөдіс войтасьны. Котөрөн и пырис керкаас, восьтіс газетсө, а сәні письмө. «Гашкө, гортысь»,— бергөдлыштіс Вова конвертсө. Тэрмасьөмөн пырис и ыджыд мамыс, град йөрын вөлі да пышйис зэр увсьыс.

— Ыджыд мам, өдйөджык лок, письмө воис.

— Час, шөвктуг, мысся да,— шыасис сійө воча.

Ыджыд мамыс чышкис кисө вышивайтөм ки чышкөдө, өчкиасис да пуксис пызан сайө. Вова сэк кості восьтөма нин конвертсө.

— Но, батыд тай гижөма. «Видза оланныд, мамук да Вовук! Чолөмала тіянөс. Миян семьяын выль морт чужис: тэныд, мам,— внучка, а Вовалы — чой. Нимсө пуктам Юля. Ме өтнам гортын, найө рөддомынөсь на».

Письмөсө лыддьөм бөрын ыджыд мамыс пернапасасис:

— Бласлө кристос, дзоньвидзаён торъялөмаось. Слава богу,— сэссия бара на пернапасасис да дыр на мыйкө шуалис вомгорулас. Вова сөмын кыліс: «Пресвятая Богородица».

Сэссия шыасис Вова дорө:

— Зэрыс кобыштас да, петав, корлы Паладь пөчтө чай юны. Быттё төді бур юөр воёмсө, пөжаси талун.

Ыджыд мамыс мөдіс лөсьөдны пызан вылө, ваяліс тасьті-пань, сёян-юан.

Вова пукаліс вөрзьөдчывтөг да мөвпаліс: көсйис гөгөрвоны письмөсьыс юөрсө, выльысь юаліс:

— Ыджыд мам, а мыйла мамөй больничаын?

— Чойтө чужтіс, да оз на лэдзны.

— А сэссия?

— Лэдзасны, да гортад нин кыкөн воасны.

— А ме?

— Тэ тані олан арөдзыс.

— Найө карын, а ме тані?

— Но, шөвктуг, лөк али мый тэныд тані? Меным гажаджык и. Век нин вом ёрт. Школаад мунігкежлө катөдасны.

Зэрыс кобис. Вова петаліс Паладь пөчла.

Пөчьяс юисны картофеля шаньгаён да варенньөөн чай, а Вова вөйтчис аслас думъясө.

«Со сійөс батыс лэччөдіс сиктө ыджыд мам ордас. А асьныс нылөс чужтөмаось. Вова, сідзкө, ковтом лои. Мамыс гортас больничаысь нывкаөс вайөдас. Вовалөн садикас вөлі жө Юля нима нывкаыс, но ньөти сійө сьөлөм вылас оз во. Няргысь да пыскыль кывъя. Гашкө, сэтшөмөс жө вайөдасны, пыртөдасны сылөн жырьё, и мөдас сійө ворсны Вовалөн чачаясөн, гашкө, и сы кроватьө на водас. Колө вөлі батарейкаа танксө татчө босьтны, жугөдны вермас.— Вова аслас шог мөвпьясысь жугыльмис, синваыс кутіс доршасьны.— Гашкө, сійөс сэссия оз нин и босьтны гортас, тані и ковмас ыджыд мамыскөд

овны. Дерт, оз жö вöлі век кывзысь мамыслысь. Со и босьтісны найö аслыныс кывзысьысь нывкаöс».

Паладь пöч гортас нин муніс, ыджыд мамыс тасьтіпань идраліс да петіс юктасьны, а Вовалөн лов вылас пыр на вöлі сэтшöм букуш, кутшöм и ывлаыс. Сьölöмсö чепльöдлöны шог думъясыс. И шуис Вова, мый аски ыджыд мамсьыс гусьöн (эрдын кө мöдас дасьтысьны — оз лэдз) мунас карö да юалас бать-мамыслысь: колö оз налы Вова. Али эсійö гортас вайöдöм нывкаыс налы мусаджык? А Вова кө налы оз ков, босьтас асьыс чачаяссö да нэм кежлас лэччас овны ыджыд мамыс ордö, коді збыль радейтö Воваöс, «шöвктугйөн» шуö да, дерт, оз веж сійöс кодкö вылö.

Карö

Мöд асылыс лои югыд да кыпыд. Шондіыс азыма юис тöрытья зэрсö: öдйö косьмисны видз выв да туй выв гöпъяс. Вова виччысьыштіс, кор ыджыд мамыс каяс вөр дорö корöсь чегъявны, босьтіс тöрытья кык көвдум (талун абу пöжасьöма), суйис югыд пакетö, төрöдіс гөррдзымсö зептас, мöд зептас пунктіс пуöм кольк да истöг көрöбын сов. Юнысö нинöм эз босьт. Кыськö оз öмöй сюр, горшыс кө косьмас? И петіс туйö.

Паладь пöч йöрас мошкоритчис да ковмис виччысьыштни кытчöкö сайöдчылöмсö, мед эз юась, кытчö-мый внукуыс мöдіс. Ылöдчынысö Вова оз радейт, а веськыдасö висьтавны оз позь, öд оз лэдз ыджыд мамыс.

Лэччис Вова кыр горув, вуджис пос вывті шор да кайис мöдар кыркötшас. Сэні вöv гидня дорын бергаліс-ноксис Ёгор дядь. Вövъясыс öні видз вылынöсь, сэні найöс дöзьöритö Ёгор дядьлөн пиыс, Виталей, а ачыс со тані идрасьö-лөсьöдчö. Ёгор дядь дінті тöдлытöг мунöм эз артмы, шыасис:

— Володя, пуксыы, шойччы. Куритчам.

— Ме ог куритчы,— вочавидзис Вова, но сувтыштіс, ыджыд морт шыасис да абу лөсьыд пырысьтөм-пыр муннысө.

— Но, пуксыыв, пуксыыв, шойччышт,— бара на корис Ёгор дядь.

Зонкалы, көть и тэрмасис, быть лои кывзысьны. Пуксисны кер пом вылө. Ёгор дядь өзтіс чигарка, модіс шпутькыны-куритны.

— Ыджыд мамыд нө көні?

— Корөсьла кайис вөр дорө, төв кежлө көзаяслы дасьтө.

— Тэнө оз өмөй босьтлывлы?

— Мукөддырйиыс катөдлывлө.

— А тэ тай нө зэв тэрыба кытчөкө муна?

Вова чөв оліс.

Ёгор дядь бара юасьө:

— Зептыд нө мый польдчөма?

— Көвдум сәні.

— Пажынөн кытчөкө модөдчөмыд?

— Карө.

— Отнадөн?— шензьө Ёгор дядь.

Сэссия мыйкө дыра кежлө чөв ланьтліс, буракө, мый йылысь кө мөвпалыштіс, но регыд бара шыасис:

— А ме тэнө талун отсасьны вөлі көсья корлыны. Виталей видз вылын, а меным колө коса төчитны. Төчиласө бергөдлысьыс некод абу. Со мичаммис, турун борьяс колө ытшкыштны. А тэ ыджыд нин, верман төчиласө бергөдлыны. Тэысь бур отсасьысь меным оз и сюр. Вай карад асыв модөдчы, а талун меным отсасьышт.

— Но,— көсьысис Вова. Верстьө морт корө да өд он вылө пуксыы. Вермө нин отсасьнысө да. Ыджыд морт дорө моз шыасисны. Асыв, сідзкө, карас мунас.

Ёгор дядь йөрө пырөм бөрын Вова пыр и аддзис төчиласө. Розя шөра, плавкөс, пызь пож нога гөгрөс из. Розь-

өдыс сой кызта бедь төчила пырыс тувъялөма. Өтар бедь помас вороп, пуысь жө вөчөма бергөдланис. Төчилаыс ва ворйын, ки вомлөс ваас бергалө. Ёгор дядь пукалө төчилавывса көзла-пуклөс вылын да косасө кутө, а Вова төчила изсө бергөдлө. Быттё и абу сьөкыд удж, а кийс зонкалөн өдйө мудзө. Өтарө шойччөдө. Ёгор дядь оз дөзмы сувталөмсьыс.

— Шойччышт, шойччышт, а сэсся васө содтышт ворьяс,— бурпырысь варовитө Ёгор дядь.

Петис йөрө Иринь тьöt.

— Мый нө кагасө уджөдан? Ме бергөдла.

— Тэ мун чай пузьөдны пукты, өбедайтны пырам. Тан ми айулов асьным нин кызкө-мыйкө.

Регыд и корис Иринь тьöt чайсө юны. И ас кадө. Вовалы быд бергөдөм нин мырдөн сорөн сетчис, кийс лөталөма, а шунысө оз лысьт, ыджыд туйө нин со, отсасьны вермысьө, пуктөны да.

Иринь тьötыс, мыйкө өдзөс сайын Ёгор дядькөд гунгыштөм бөрын, кытчөкө сиктө петис.

Шыд тасьтi панялөм да чай юөм бөрын Вова бара на недыр бергөдлыштис изсө, кытчөдз Ёгор дядь эз шу:

— Тырмас. Бур. Бритва кодь лэчыд лои.

Видзөдө Вова: Иринь тьöt локтө, а сы бөрся ыджыд мамыс.

— Прамөй зонмөс быдтан,— шыясис сы дөрө Ёгор дядь.— Ёна отсасис меным талун Воваыд. Асыв позьö ытшкыны петны.

Киөдыс кутөмөн и нуөдис сэсся ыджыд мамыс гортас. Мудзөм бөрад өдйө и унмовсис Вова, некутшөм гажтөм мөвпьяс эз падмөдны сийөс.

Орчча сиктö

Асылыс төрытъя кодъ жö мича пуксис. Шондi гөгөр саякйö югöрсö. Енэжыс лöz: кымөр чир оз тыдав. Ыджыд мамыс вöччöма, абу быд лунъя паськöма: лöz юбкаа да еджыд вылын сэтшöм жö посни лöz дзоридзья-са ковтаа. Юрас мича еджыд чышъян кöртыштöма. Том-мöма быдөн.

— Ыджыд мам, тэ талун быттьö уна рöма бобув.

— Но-о!— серöктiс сийö.— Тэ, инö, вöччы жö, ветлам орчча сиктö, пошта вылö, звöнитлам батыдлы, мед волас.

— Мыйла?

— Мед тэнö карö катöдлас, чойыдкöд тöдмöдас. Сийö öд дзоля на, да татчö оз на лэччöдлыны-а.

Со öд мый ыджыд мамыс думыштöма, Вова вöли ачыс лöсьöдчö карас мунны-а.

Вова мича кельыдлöz дөрöм кышалiс, джинсы гача-сис. Камашияссö ыджыд мамыс крема щöткаөн югъявтöдз весалöма. Петiсны туйö. Вöв гидня дорын бара Ёгор дядькöд вочаасисны.

— Талун, тыдалö, пöча-пия кытчöкö ылö мöдöдчöмныд?

Ыджыд мамыс висьталiс, кутшöм мөгөн туйö вöрзьöдчöмаöсь.

Орчча сиктыс матын. Позьö асфальта туйтi мунны, а позьö и весьтасавны муяс-видзьяс вомөн, пода туйöд. Ыджыд мамыс веськöдчис пода туйöдыс, чорыд вывтiыс ылын дай сьökыд вöсьлавнысö. Майбыр, шондiа да кос.

Вова öтарö кольччылö, мышкыртчылö да ботинки вивсьыс буссö чышкыштö. Ыджыд мамыслөн весиг се-рамыс петiс:

— Ми челядь дырйи вöли кöмкоттö жалитам да кöмтöг ветлöдлам. Сиктö пыригөн сöмын кöмасям.

Вова кылис тайö да бара кольччис, пöрччис ка-машисö, кöвъясöдыс кöрталiс, öшöдiс бедь йылö да сiдзикөн и вöтöдiс ыджыд мамсö:

— Тадз вöлі ветлöдланныд?

— Тадз, тадз, шöвктуг. Кöмтöгыд пö, висьталöны, зэв на и бур.

Сиктö воигөн Вова бөр кöмасис. Сиктыс вöлі тöдчымөн ыджыдджык ыджыд мамыслөн дорысь, асфальта туйті гежöдика журкнитлісны машинаяс. Мунісны ыджыд öшина школа, лавка да пу вичко дорті, пырисны пошта вылö. Йöзыс уна да ковмис виччысьыштны. Вовалы оз пукавсьы да ыджыд мамыс ыстіс сійöс ывлаö. Сöмын пö ылö эн мун, вошан. Пошта-керкасö гөгöртöм бöрын да мыйкö дыра кильчö вылас сулалыштöм бöрын, Вова восьтіс öдзöссö да кыліс ыджыд мамыслысь телефон пыр сёрнисö:

— Тöрыт нин мöдöдчылöма. Не Ёгорыс кö, код тöдас көн нин эськö öні вöлі. Катöдлöй да петкöдлöй чойсö, гашкö, бөр усьпаньвыв пуксяс. Пышгъяс кö, мый ме кута вöчны?

Вова тайö кывгъяссö кылöм бöрын эз и пыр пошта вылас, бөр пöдлаліс öдзöссö.

«Со мый вöлöма! Ёгор дядьыд менö карö кайöмысь кутöма. Мися, мыйкö зэв мудера нюмгёвтлывліс. А ме чайті, мый збыль отсасьысь ковмис. А ыджыд мам кутшöм мудер! Кыв эз шу, а ставсö вöлöм тöдö.»

Пошта вылысь ыджыд мамыс петіс кыпыд чужöма.

— Асыв батыд волас. Шойччан лунгъяс кежлö тэнö карö катöдлас. Мамыд чойыдкöд гортынöсь нин.

Бöрсö мунігөн Вова бара кöмкотсö бедь йылын нуис. Сэтшöм лöсьыд вöлöм кöмтöгыс! Ыджыд мам тай шуліс, важөн пö челядыд абу и кöмасьлöмаöсь. Вова тадзи, кöмтöг, и мöдас сиктöдыс ветлöдлыны.

Ас грездас воём бöрын Вова сетіс ботинкисö ыджыд мамыслы, ачыс кежис Ёгор дядь йөрö. Сійö пукаліс кильчö вылас да куритчис.

— Мый нин, Вова, висьталан?— шыасис.

— Асыв батыö мела машинаөн локтас, карö катöдас.

— Бөр на өд волан? Гожомбыд буса карас өд он жө ов? Тани со уджыс пөчылдөн юр вылөдзыс тырмө и... Зэв нин бур отсасысь тэ. Сідзкө, колө и отсыштны скөтыслы көрымсө дасытыны.

— Ёгор дядь, тэ карас кайөмысь косөдөм ради төрыт косатө төчитөдін?

— Эг жө!— быттьө чуймис Ёгор дядь.— Төрытъя косанад ме со быдса йөр турун водтөді асывводзнас, йөз узигкості на. Видзөдлы. Асывнас тодө лэччыла, сэні менам неыджыд видз. Мөс видзам, ковмас төвйөдмөн турун заптыны.

Вова ышловзис: вот сэся и гөгөрво верстьөястө. Зэв өд мудерөсь!

Морта небөг

Батьыс воис кыпыд руа. Кутыштліс ыджыд мамсө, кыпөдліс Воваөс пөтөлөкөдз. Карса гөснечнас тыртис пызан выв: кампет, яблөг, банан, преник-печенньө. Сы мында: чөсмась — оз ков.

Вовалы батьыс вайөма морта небөг. Быдторсө серпасалөма, а быд серпас улын кывбура неыджыд гижөд. Со налим сера кань, со куканя мөс, со вөв дорын чибө, нывкаяс да зонкаяс слөнөс вердөны-чөсмөдлөны, а дзык помас еджыд юрсия нывка серпасалө гулюөс. Сэтшөм ярьюгыд рөмъяса выль небөггыс. Öтигысь видлаліс Вова, мөдысь... А кор батьыс петіс пывсянас ва катлыны, Вова выль небөгнас мөдөдчис сиктө. Медводз муніс Ия да Лида дорө, найө бара чомйысь ворсөны. Накөд вөлі тшөтш Дима. Тайө тшөтшъя зонкаыскөд Вова ворсліс жө нин: чорыд сутуга йылын көрт гөгыль быгльөдлісны. Кытчө сөмын сэк эз волыны...

Чойяслы зэв ёна воис сьөлөм вылас небөггыс, унаысь жө видлалісны.

— Меным кө эськө татшөм небөгсө козьналісны?—
нора кайтыштіс Ия.

— Зэв мича небөг батыд вайөма,— рама нюмъяліг-
тыр мыччис книгасө Лида.

— Бөрйы, кутшөм серпас тэныд колө.

— Мый тэ, Володюш,— бөрыньтчис нывка.

— Меным этійө левсө,— корө збой Ия, өти кок пөв
йылас чеччалігмоз.

Вова нетшыштіс корөм серпассө да мыччис нывкалы.

— А меным шыръяса серпассө вай,— шыасис Дима.—
Ичөт чойөс повзьөдла,— гажаа нюмъяліс сійө.

— Босът,— мыччис сылы Вова.

Лидалы торйөдіс слөна лист бок да ачыс гажаа
серөктіс:

— Мед ставлы лоө.

Гортас мунігөн кежаліс Кузь Коля ордө, но сійө эз
вөв гортын. Мамыс шуис, лэччис пө ю дорө. Сылы Вова
торйөдіс ёкыш чериа серпас. Сэсса пыраліс Ёгор дядь
ордө, козьналіс чибөа лист. Медбөрын нин кежаліс Гад-
дя Паладь ордө, сетіс сылы налим сера каньөс. Паладь
пөчлы нимкодь лои:

— Тайө дзик менам кань кодь. Стенө өшөда.

Сэсса пуксьөдіс Воваөс пызан сайө. Вайис көвдум,
вуй, варенньө. Көвдумсө шөри вундіс, мавтіс вуйөн, а
вылісө варенньөаліс. Сэтшөм чөскыда Паладь пөч
гөститөдіс.

Гортас Вова вайис сөмын небөг кышсө. Но сьөлөм вы-
лас вөлі долыд, мед батыслөн козиныс быдөн ордын лоө.

Рытнас ая-пиа пывсисны, ёна и корөсяліс батыыс
Воваөс. Тэ өд пө өні абу нин ичөт, тэ — миян ыджыд пи.

Вова нимкодясис, мый воис батыыс, вайис сылы ко-
зин, а сійө юкліс сиктсалы. Нөшта казяліс, мый батыыс
сійөс радейтө важ моз, гашкө нө, збыль оз көсйы вежны
сійөс нывка вылас. А мамыс? Гашкө, мамыс сійөс оз
нин радейт да? Сылөн эм ичөтик нывка.



— Асыв чойтö аддзылан,— быттö кылöма майшасьöмсö батыс.

— А кутшöмджык сийö?— вашнитöмөн юалис пиыс.

— Ичöтик да бөрдыс.

Бара Вовалы тöд вылас уси садикса бөрдыс Юляыс. И ньöти абу окота сэтшöмсö видзöдлыныс. Но сийö олö на ордын, гашкö, Вова жырйын.

— Менам чачаөн ворсö?— юасьö пиыс.

— Оз, оз. Оз на куж сийö ворснысö. Узь. Асыв аддзылан.

Но дыр на эз вермы унмовсьны зонка, кызди и письмö воан войö.

Чой

Небыдика шлывгö машинаыс асфальта туйтi, катöдö Воваöс карö. Батыс руль сайын да ёнасö оз варовит. Ыджыд мамсö корöны жö вöли карас, но эз кöсйысь, кöзаясöс пö ог энөвт. Катöны карö бидонын кöза йöв, рысь, картофеля шаньгаяс: талун ыджыд мамыс водз чеччöма да быдторсö пöжалöма.

Вова вöйтчöма аслас мөвпгьясас, виччысьö чойыскöд аддзысьöм. Со и кар: уна судта джуджыд керкаяс, машина-автобусыс жуö. Вовалы быттö велавтöм нин карса шума олöмыс. Шы ни тöv öд вöли ыджыд мамыслөн грездын. Машинаыс оз журъявны, некутшöм шум ни жургöм эз сьöдмөд пельсö.

Со и налөн керка. Вова котöртö батысьыс водзын. Таркöдö öдзöсö, звöнок кнопкаöдзыс сийö оз на судз.

Öдзöссö восьтö мамыс; сийö — кокныдик кельыдлöz халата — шевгöдö кияссö да топыда кутлö Воваöс, окыштö кытчöкö пель саяс. Зонкалы нимкодь: мамыс сийöс радейтö. И некутшöм нывка вылö сийöс оз, дерт, веж.

— Кöни?— юалö сийö.

— Со, узьö,— коляска вылö индö мамыс. Вова ловшысö кутöмөн видзöдö тубрас вылö. Со ичöтик гөрд чужöм, муртса вөрöдыштiс-тяпкөдыштiс вом дорнас.

— Тайо и эм Юляыд? — юалис Вова.

— Да, — меліа нюммунө мамыс.

Вовалөн лөнис зэлавлөм лолыс. Татшөм ичөтик. Румумө тубралөма. А Вова чайтис, мый ворсө сылөн чачаясөн. Пырالیс да видзөдліс ассыс жырсө — ставыс вөлі сідзи, кыдзи и кольліс: чачаяс асінас.

— Уп! — ыджыда ышловзис Вова. — Гортө вои.

— Мыссы да пызан сайө пуксы. Вердышта туй выв йөзөс, — мамыс меліа шылькнитис Воваөс юрситиыс. — Быдмыштөмыд весиг. Гожъялөмыд ёна.

И Вова мөдіс висътавлыны мамыслы чери кыйөм йылысь, чиганъяс волөм йылысь, Ёгор дядьлы отсасьөм йылысь. Өні Вова төдіс, мый сійөс и мамыс, и батыс радейтөны, и некод вылө сійөс, дерт, оз вежны. А чойыс зэв на и мусаник, абу детсадса Юля кодь.

Сейыштөм бөрын Вова мамыскөд петалисны ывлаө, коляскаын ичөт чойнас. Керкаса став зонпосниыс төдмалісны, мый Вовалөн эм чой, код вөсна сійө мөдас төждысьны, кутас ськөд ворсны да дорйыны дзерөдысь зонкаясысь.

Шор помөм

Карө ветлөм бөрын Вова воис сиктө быттө вежөмаөн. Ыджыд мам дорсьыс оз и вешйыв, отсасьө сылы. Корөсьыс көзаяслы тырмымөн лои сайникын, мөдісны дзоля да пөрысь турун заптыны.

Ыджыд мамыс ытшкө, а Вова сэк кості апалө туруныслысь чөскыд көрсө, төрытъя ытшкөмсө ичөтик пелькиник куранөн бергөдлө, вөрзьөдышталө, мед өдийөджык косьмас. Сэсся воддза лунъя косьмөм вөвдөмсө куртөны да нөбъялөны: Вовалөн ичөтик, ыджыд мамыслөн йөрышаджык — сідзи и ваялөны гортаныс турунсө борьясысь.

Вова виччысис бать-мамсө ичөтик чоюкыскөд, көсийсны воыны сиктө, кор батыслы сетасны шойччан лунъяс.

Мамысыяс воисны виччысытөг, лун шөр гөгөр. Вова уськөдчис ывлаө. Ыджыд мамыс дзирья сайөдз петіс вочаавны выль воысыясөс. Ки вылас босьтіс Юляөс да пыртіс керкаас, сэсса небыдика, муртса инмөдчылөмөн, люкөдіс кагасө юрнас ыджыд пачө да вордіс:

Пач кодь ён, би кодь тэрыбөн,

— Тшын кодь писькөсөн быдмы, бур ныв.

— Ыджыд мам, мыйла тадзсө вөчан?

— Миян мамъяс тадзи выль олысьөс пыртөдлісны, и ме сідзи жө вөча. Тэнө өд люкөдлі жө. Со и быдман тэрыбөн, сусьөн, писькөсөн,— гылыда сералө Вовалөн ыджыд мамыс.

Вовалы нимкодь: став семьяныс өтчукөрын. Унанад гажаджык. Батыскөд ветласны чери кыйны, весиг войколөн, вөрө кайласны тшак вотны, уджыд-нокыд сиктад тырмымөн.

Сейыштөм бөрын Вова петіс батыскөд пывсян ломтыны. Батыс карысь вайөма электромотора ва кыпөдан насос. Кузь шлангыс шорсянь пывсянөдзыс судзө. Оз нин ковмы ыджыд мамыслы ведраясөн кыскасьны.

Вовалы таысь нөшта нин нимкодь. Ачыс нинөм эз куж мөвпыштны, мед кокньөдны ыджыд мамсө, а батыс со вежөртөма.

Нюжөдісны шланг да вөсньыдик провод, лэччөдісны да пос дорас ваас лэдзисны мотора насоссө. Батыс кайис пывсянас, суйис вөсньыд проводыслысь вожа помсө розеткаө. Кыліс дзужгөм, и пывсян пөртійө кутіс киссьыны шланг помысь ва, но ведра нель тыртөм бөрын ваыс гудыртчис да Вовалөн батыс бөр дугөдіс моторсө.

— Ляпкыд шорыс, гудыртчө,— висьталіс батыс.

Ковмис час кымын виччысьны сөдзөмсө, выль ва чукөрмөмсө.

— Талун ог нин босьтчөй, асыв ковмас тэа-меалы уджө кутчысьны, джудждөдны шорсьыс гөпсө.

Мөд луннас ая-пиалөн некутшөм шойччөг эз вөв. Мед-водз чукөртисны му помъяссыыс да бокъяссыыс изъяс, кодйыштисны-джудждөдисны шорсө, зыр вороп кузяө. Ваыс көдзид, ключ, да батыс кузь гөленя сапөгөн уджаліс, зыройөн шыблаліс пыдөссыыс лыасө да нюйтсө. Эжисны пыдөссө да бокъяссө изъяснас да нөшта изъяснас жө и помисны юкмөс горувсө.

— Бассейн кодь лои, оз кут гудыртчыны,— нимкодя сёрнитіс батыс.— Бур юкмөс тэа-меа вөчим. Аски видзөдлам, гудырыс пуксяс да, кутшөм лоө.

Кык лун на сэсся гудыртлісны шорсө, мед пуксьөм лыаыс да нюитыс кылалас шор горувсө. Сэсся сөдзис ваыс да сярвидзө-тыдалө пыдөсыс, уна рөма изъя. Эз мөд гудыртчыны шорыс насоснас васө пывсянө лэптигөн. Мыйкө жө и шензис ыджыд мамыс. Весиг Паладь пөч лэччыліс шор дорөдзыс да дивуйтчис ая-пиалөн удж вылө.

— Тэ, Паладь тьөт, миян пывсянысь и босьт шор ватө, кор ковмас, эн и лэчыв татчөдз,— велөдө Вовалөн батыс.

— Зэв тай кужысь киаөсь ті ая-пиа,— ошкө пөчө мужичөйясөс.

Вова нимкодясьө: кутшөм кокни лоө ыджыд мамыслы, ваыс шорсыыс пывсянөдз воө да.

Лэбачьяс велөдысь

Вова лун-лун виччысис Володя дядьсө. Мамыс висьталіс, сійө пө миян учёнөй, олө Москваын, письмөын көсйысьөма волыны сиктө шойччыны.

Вова инас оз өшйы, сэтшөм окота видзөдлыны учёнөй вылас. Буракө, сійө ыджыд да ён, кыз рушка да өчкиа, ньөжмыд да вылө пуксысь. Сөмын книга лыддьө да мыйкө зунясьө-гижө. Вова весиг пызан вывсыыс став небөгсө идраліс да джаджйө тэчис, мед, колөкө, пуксяс

да гижас учёнй уджъяссö. Родыштö на весиг зонка: мыйкö, дерт, мöдас сылысь юасыны, да вочавидзнысö, гашкö, оз куж...

А воис Володя чожыс да чуймöдiс Воваöс — сийö вöли пöрысьмыштöм детинка кодъ. Кымöсыс да син доръясыс ёна нин чукурöсь, а тöвся енэж кодъ руд синмыс вильыш. Шöркодъ тушаа, вöсныдик, визув да пельк, и öчки оз новлы. Мамыс кодъ жö руд чикыля юрсиа. И Вовалөн сэтшöм, сöмын югыдджык. Володя чожыс нюмсера да шмонитысь, тэрыб да варов. Вовалөн быттьö ыджыдджык ёрт воис. Аскöдыс компас да бинокль вайöма: шойччигмоз пö и уджалышта. А мый мöдас уджавны — эз висътав. Дерт, көнкö, Вова пызан сайö пуксяс да гижны мöдас. Сöмын татшöм тэрыбыс кызди пызан саяс öшъяс?

Учёнöявнысö эз и мöд чожыс, весиг пызан саяс эз пуксьыв, воёмөн тшöтш петiс пывсян ломтыны, сэтшöма гажыс бырöма. Ёна ошкис ая-пиаöс шорас юкмöс лöсьöдöмысь. Рытыс сэсся кыпыд вöли: öтырышъя сералисны чоя-вока, важсö казътылиг. Ыджыд мамыс мелi нюмөн видзöдö став вылö: сьöлöмыс бурмöма.

Мöд асывнас Володя чожыс водз чуксалис Воваöс, ветлам пö джыдж позъяс видзöдлам.

Асылыс вöли чуймöдана лөнъ да шоныд. Пыжөн и мöдöдчисны ю паныд. Поводнöя лои сынны.

Алькöсiныс помасис. Водзын тыдовтчис джуджыд, вывсянныс ваöдзыс веськыда лэччысь берег, быттьö кодкö ыджыд пуртөн шöрыштöма — тадзи ваыс сёйöд берегсö вундöма-шыльöдöма. Пыжыд кö татчö путкыльтчас, берегас кайнысö он во. Да и ёна визувджык сэни. Сыннысö Володя чожлы сьöкыдджык лои, весиг со вабольяс чепöсйисны кымöсас.

Чöv-лөнъсö танi торкисны пемыдруд, весиг гöрдоват рöма лэбачьяс. Найö тюръялисны ва веркöсöдыс, кыйисны лэбалысь гут-гагсö да гораа чивзiсны.

— Тайö джыджъяс. Со и позъясныс. Аддзан берег вевдорсьыс гөгрөсінік розьяссө?— висьталіс да петкөдліс Вовалы Володя дядьыс.

— Кутшөм уна!— шензис Вова.

Крут берегыс помассьытөдз пыжнас катлісны, кытысянь джыджъясыслөн позъясыс заводитчөны, а сэсся Володя дядьыс дугдіс сынны, кылөдчигмозыс лыддис джыдж позъяссө да гижаліс морөс зепсьыс перйөм блокнотө.

— Содөма лыдыс! Кольөм во серти,— нимкодъмис Вовалөн дядьыс.

— Мыйла тайөс гижалан?— юасьö Вова.

— Менам уджөй татшөм: лэбачьяс бөрся видзөдны, артавны.

— А пыдөдз-ө эськө кодйысьөмаось поз вөчысь джыджъясыс?

— А му сертиыс. Чорыд-ө берегса сөйыс. Öтияс — метр джын, мөдъяс көнсюрө кодйысьөны метрөнджынйөн пыднаөдз. Кык-куим лунөн позныс дась. Пыдіыс паськыдджык пыранінсьыс. Кодйөм бөрас кос турун сіяс пыртлөны да лэбач гөн. Вит-квйт кольк пуктөны, сэсся энъыс да айыс вежласьөмөн пөжөны. Дас вит лун мысти нин джыджпияныс кольк кышсө поткөдөны, а позсьыс нөшта лун кызь на оз петны. Сэсся велөдчөны лэбавны да водз, моз төлысьö, и мөдөдчөны шоныджыкинө.

Вова сюся кывзө Володя чожыслысь висьталөмсө.

— Эм нөшта мөд пөлөс джыдж, сиктын олө. Сійөс шуөны вожа бөжа чикышөн.

— Вожа бөжа чикыштө ме төда,— шызис Вова.— Сійө ыджыд мамлөн гид вевта-стена костас поздысьөма. Зэв мича лэбач, морөсыс еджыд, голя улыс сьөд, мышвылыс пемыдлөзөн лөсталө. Сьылі вылас да кымөсас гөрдөв чут. Ыджыд мам шуө: ай чикышыс пө пьяннас ошйысьö: «Пи-вит, пи-вит».

— Пияннас ошйысьö?— выльысь юалö да гылыда сералö Володя чожыс, а сэссия ошкыштö Воваöс:— Бура ставсö казялöмыд!

— А збыль вит пи сылөн?

— Унджыкысьсö. Но овлö и нель, гежöдика — квайт.

Кывзö Вова, пель саяс сюркнялö. Эз казавны варовитгад, кызди крут берегыс алькösөн вежсис, а сэссия пыжсö найö курьяö веськöдiсны. Шыблалiсны донкаяс да курья мöдарас вуджалiсны. Видзöдлiсны сэтöр кустьяс: воöма вотöсыс, пев пом гырся тусьяс розйөн öшалöны. Окотаысь сёйыштiсны, а вотчынысö мöдысь шуисны волыны.

Кыйсьыштiсны, пумөн чери шедi. Бөр кывтöны гортлань ньöжйöникөн. Вова гоньялö юрнас öтарö-мöдарö, бинокльөн видзöдчö.

— Со, каля лэбö,— индiс Вова еджыдруд лэбач вылö.

— Тöдiн,— нюмдöмөн шыасис дядьыс да юалiс:— Но и мый тэ кужан висьтавны на йылысь?

— Вадорын олöны, сiдзкö, чери кыйöны,— воча серöктiс Вова.

— Сэссия мый тöдан?

— Найö оз танi тövйыны.

— Мыйла эськö?

— Юыс кынмö, и сёяныс бырö, йи улын лöö.

— Поздысьöны кытчö?

— Ог тöд. Буракö, вадорас жö кытчöкö матöджык.

— Сiдз. Воöны миянö апрель помын да ю дорö либö ты дорö и поздысьöны, зiльöны кыкнанныс, эньыс и айыс. Корсясны ойдлытöм места, косджыкин, ваяласны увьяс, вольсаласны турун. Куим кольк пуктасны, сэссия кыкнанныс вежласьöмөн и пöжöны. Пияныс кольксьыс гöнаöсь нин петöны. Сентябрь помын татысь лэбöны медсясö Скандинавияö да Балтийскöй море дорö, а мукöдыс весиг Средиземнöй море дорöдз воöдчöны.

— Володя чож, а сэтчöдз ылын?

— Зэв ылын. Гортö воам, да ме тэныд карта вылысь петкөдла, көні найö төвйöны.

Вова шензьö, мыйта төдö сылөн чожыс. Буракö, зэв уна книга лыддьöма. Вова эськö пыравліс жö библиоте-каас мамыскөд, но кыз небөгъяс вылас полөмпырысь видзөдіс: кызди татшөм кызсö лыддьöны йöзыс.

— Володя чож, кытысь тэ тайö ставсö төдмалін?

— Тэ арлыда вöлі, кор лэбачьяслысь оланногсö куті туявны. Сиктын олысь лэбачьяс бөрся медводз видзөді, кор воöны, кызди поздысьöны. Сэсса вөрö мөді ветлөд-лыны, а быдмышті да зэв уна книга лыдди.

— Тэ, сідзкö, Володя чож, лэбач учёной.

Чожлөн бара татчö серамыс петіс.

— Бурджык шуны — лэбачьяслысь оласногсö төдма-лысь, а мөд ногөн кө,— орнитолог.

— Ор-ни-то-лог,— коставлана тэчасөн шуис тешкодъ да гөгөрвотөм кывсö зонка.

Рытланьыс дядя-пия воисны гортаныс. Мудзöсь, но шудаöсь да варовöсь. Юква вылө чери вайисны. А мый-та төдмаліс öти лунөн Вова! Дядьыслөн уджыс сьөлөм вылас воис зонкалы. Код төдас... Коркö, быдмас да, гашкö, лоас тшöтш эсійөн... орни... кызд нин... Но, лэ-бачьясыслысь оласногсö кутас төдмавны.

Карö

Колльöдны Воваöс ыджыд мамыс да Володя дядьыс петісны дзирья сайөдз. Мамыс чойыскөд машинаын нин пукалісны.

— Но, сэсса, шөвктуг, бура велөдчы да кывзысьöмөн ов,— топөдліс сійö зонкаöс морөс бердас.— Мөд во бара гожөмбыд кежлө лок, меным гажаджык.

— Водз карад мунан, эськö мыйта на вөр-ваöдыс собалім öтлаын,— бара на кайтіс дядьыс.

Петёма колльөдны и Паладь пөч. Йөрас сулалө, потшөс вылас мыджсьөмөн.

— Но, Вова, мунан нин? Гөтрасьны вөлі ме вылө көсьян, а пышьян.

— Кор ме көсьысьлі?— юалөмөн воча шыасьө Вова.

— Төрыт нө мый, пывсян дорад.

— Нинөм ме эг көсьысьлы,— дөзмөмөн вочавидзө зонка.— Ыджыд мам, шу мыйкө...

Ыджыд мамыс сөмын небыдика нюммунис воча. Вовалы төд вылас уси сылөн коркөя шуөмыс: «Шмонь вылө шмоньөн и вочавидз».

И Вова нюммуни пөрысь мортлы:

— Тэ, Паладь пөч, виччысьлы, кытчөдз ог быдмы.

Вак-вакөн серөктисны ставөн.

— Вот и бур, пиук. Ме мөда виччысьны. А тэ эн вунөд менө, карад олігад.

Батьыс чуймыштөмөн чөвтліс синсө пиыс вылө:

— Но-о! Шмонитны нин велалөмыд?

А Вовалы сьөлөм вылас лои кокньыдсьыс-кокньыд. И сійө гөгөрвоис, мый радейтө и ыджыд мамсө, и дядьсө, и шмонитны кужысь Паладь пөчөс, и керкасө, и кыр дорө куткыртчөм пывсянсө, и вөр дорсө, и вадорсө, и Лидаөс вильышпоз Ия чойыскөд, и Ёгор дядьөс Иринь тьөтыскөд, и Кузь Коляөс — сиктса став олысьсө. И төдіс Вова: локтан гожөм бара воас татчө, кутас отсасьны ыджыд мамыслы чегъявны корөсь, шмонитны Паладь пөчкөд, кыйны чери Кузь Колякөд, да быдтор вөчны, мый сяммас-кужас да вермас.



ЛӖЗ КЛЯНИЧА

Висьтъяс



Мороз Пӧльлӧн КОЗИН

Асывнас, муртса Аннуш восьтис синсӧ, пыр и уси дум вылас, мый талун Выль во. Чеччис вольпась вывсьыс и — ёлка дорӧ. Сидзи и эм. Ёлка улас мешӧк сулалӧ, гӧрд ленточкаӧн кӧрталӧма. Дерт жӧ, тані Мороз Пӧльлӧн козин. Сӧмын вот мый эськӧ тані? Аннуш помнитӧ, колян во Мороз Пӧль вайис дадь, воддза воӧ — акань. А талун нӧ мый?

Вежон чӧж нин Аннуш мӧвпалӧ козин йылысь. Весиг мамыслысь тшӧкыда юавліс:

— Ваяс оз таво Мороз Пӧльыс козинсӧ?

А мамыс вочавидзліс:

— Бура кө олан: гырысьяслысь кывзысян, чачаястө ворсөм бөрад ас местаө тэчан, гашкө, и ваяс.

И со. Кыскис Аннуш ёлка увсьыс мешөксө, разис гөрөдсө, восьтіс. И кыскис сэтысь... Портфель. Вот тайө да! Портфель. А кутшөм мича, съода-гөрда, мича югъялан томанъяса. Колснитіс-восьтіс томанъяссө. А пытшкас тетрадыас, ручка, карандашъяс. Анна радысла эз төд, мый и вөчны. Окота вөлі кодлыкө петкөдлыны козинсө, өтвылысь радлыштны. Көть эськө садйө нуан, но талун сэн некод абу, праздник лун. Мамыс, дерт, мөсьяс дорын фермаын. А папыс кытчөкө петөма, абу жө гортын. Көть эськө суседъясө петавны, Шурлы петкөдлыны. Но сійө таво велөдчө нин школаын да, көнкө, бара кагалы моз шуас: «Аддзөмыд, мыйөн ошйысьны».

— Час, Агния баб ордө ветла.

Пасьтасис Анна, көлысас кияссө суйөмөн лэптис портфельсө мыш вылас (аддзывліс, кызди Шур ветлөдлө школаө) да мөдөдчис пөчыс ордө.

— Агния баб,— пырөмөн тшөтш горөдіс Анна,— Мороз Пөльыд меным козин войнас вайөма, портфель. Видзөдлы, видзөдлы, кутшөм мича! Югыд томанъяса. А пытшкас, пытшкас! Абуыс сөмын абу.

— Но, таво школаө нин мунан?— нюмъялігтыр юалө Агния баб.

— Школаө. Локтан ар муна. Сизим арөс нин меным регыд лоө.

— Но и шань. Сідзкө, тэ нин ыджыд.

Аннуш чөв олыштис, мөвпалыштис, сэссия шуис:

— Агния баб, сөмын ме вот некыз ог гөгөрво, кытысь Мороз Пөльыс төдө, мый меным портфельыс зэв ёна колө вөлі?

Мойдчөм

Рөмыд. Анна пукаліс Агния баб ордын өшиньдорса лабич вылын да видзөдіс турөбалысь ывлаө. Ышмысь төлыс кыськө помтөг вайис лым. Анналы вөлі гажтөм, көть пөчыс вөлі орччөн да печкис.

— Агния баб, вай мыйкө мойд,— корис Аннуш.

— Став мойдсө нин мойдлі, нинөм нин эз коль.

— Мойд,— дзайгысян гөлөсөн нюжөдіс Аннуш.

— Тэ шуан: мойд, ме шуа: мойд. А еджыд ошкөс мойда ог?

— Мойд,— збоя вочавидзө нывка.

— Тэ шуан: мойд, ме шуа: мойд. А сьөд ошкөс мойда ог?

— Но мойд.

— Тэ шуан: но мойд, ме шуа: но мойд. А визя ошкөс мойда ог?

— Сэтшөмыс оз овывлы,— серөктіс Аннуш.

— Тэ шуан: сэтшөмыс оз овывлы, ме шуа: сэтшөмыс оз овывлы. А лөз ошкөс мойда ог?

— Да мойд, мойд.

— Тэ шуан: да мойд, мойд, ме шуа: да мойд, мойд. А гөрд ошкөс мойда ог?

— Но, Агния баб...

— Тэ шуан: но, Агния баб, ме шуа: но, Агния баб. А туся ошкөс мойда ог?

— Эн!— дөзмөмөн вочавидзө Аннуш.— Тырмас.

— Тэ шуан: тырмас, ме шуа: тырмас. А виж ошкөс мойда ог?

— Нинөм сэсся ог шу,— лөгасис нывка.

— Тэ шуан: нинөм сэсся ог шу, ме шуа: нинөм сэсся ог шу. А турунвиж ошкөс мойда ог?

— Да тырмас, тырмас. Ог сэсся тадз мойдчө. Мыйкө бурөс мойд.

— Но ме сэссия нинөм ог куж. Ачылд вай көть өтиөс мойд. Али он жө куж?— юалис Агния баб.

— Мыйла ог куж? Мойда,— көсйысис Аннуш.

Чөв олыштіс. Мичаджыка пуксис. Сэссия лөсьөдыштіс платтьөсө, кисө пунктіс пидзөс вылас да заводитіс:

— Олісны-вылісны гозъя. Налөн вөлі өти пи, Иван. Коркө Иван и шуө: «Ветла ме ылі муө-ваө, йөзсө видзөдла, ачымөс петкөдла». Косьтіс нянь, сөвтис мыш нопйө и мөдөдчис. Муніс да муніс, да муніс; муніс да муніс, да муніс. Ю воис. Вуджис. Муніс да муніс, да муніс; муніс да муніс, да муніс. Муніс да муніс, да муніс. Сэссия и бөр гортас воис.

Аннуш ланьтіс. Агния баб видзөдліс внучкаыс вылө да юалис:

— Пом нин воис?

— Пом.

— А мыйкө зэв дженьыд мойдыд да?

— Да-а,— нюжөдіс Аннуш.— А мый дыра сійө муніс.

Уськөдлысь лызь

Батьыс Анналөн шофёр. Сійө журкнитлөма-ветлөма карө да вайөма нылыслы выль лызь. Лызьыс мича, кузь, лөз краскаөн мавтөма, а нырас нөшта на и лым чир серпасалөма. А Аннушлы нимкодъыс. Матыстчылас лызь дорас, видлас, шыльөдыштас, киас босьтас да чеччалыштас, бөр пуктас.

Өдва вермис Аннуш мөд лунсө виччысьны. Да и шойчан лун слөймис, оз ков садйө мунны. Водз зэв чеччис. Тшөкыда видзөдлывлө, оз-ө нин кыз гыөра өшинь пырыс югыдыс тыдав. Ньөжйөник мөдіс жө асылыс лөзавны, а сэссия югдіс. Босьтіс Аннуш лызьсө да петіс ывлаө. Көдзыдыс пыр и тшапкис нывкаөс нырөдыс. Шондіа. Югыд. Лымйыс дзирдалө да дзуртө кок улад.

Лызясис Аннуш да мөдөдчис Шылыд чой дінө, кытчо везджык чукөртчывлөны посныдджыкъяс. Ньөжйөник Аннуш мунө, мед быдөн аддыласны, кутшөм мича лызь вайис сылы батыс. Воис Шылыд чой дінө, а сәні челядь пиысь некод абу, сәтшөм водз петсьөма Аннушлөн. Сувтіс чой йылас. Сьөлөмыс радысла тіпкө. Сәсся йөткысис бедьяснас, исковтис да и шнөпкысис-уси. Ёнакодъ эськө доймис, но кутчысис, эз бөрддзы. Чой вочасө некыдз лызнас эз вермы кайныс, сәтшөм вильыд. Ковмис пөрччыны да киас катөдны. Мөдысь исковтис — бара уси. Коймөдысь, нельөдысь... И век усялө.

Синваыс доршасьө Аннушлөн. Со өд кутшөм мича лызьыс, да уськөдлысь вөлөма. «Нуа гортө да шыбита кильчө улө, мед, колөк, батьө ачыс исласьө лөк лызнас. А ме ассыым важ ичөтик лызьөс босьта, сійө, небось, оз уськөдлы», — мөвпыштіс нывка.

Бергөдчис бөр гортланьыс, а сылы воча Шур локтө, суседыс, өти арөн сөмын и ыджыд Аннушысь. Зэв едждыд юрси вөснаыс сійөс нөшта Нөк юрөн нимтөны.

— Э-э-э,— серөктис Шур, аддзис лым сюръя кодъ Аннушөс да.— Тэн нин дөвөль сюрөма.

Анна букышөн видзөдліс детинка вылө.

— А лызьыс, лызьыс! Кысь татшөмыс?— завидьпырысь юасьө зонка.

— Батьө карысь вайис. Да омөль лызь сюрөма, уськөдлө,— бара на нырнас кыскыштіс Аннуш.

— Вайлы, ме исковтла,— корис Шур.

Исковтис да эз и усь. Аннуш вом паськөдөмөн видзөдө сы вылө.

— Эк тэ, уськөдлысь лызь пө! Ачыд он куж да со и усялан,— дэльөдан гөлөсөн шуалис Шур.

Аннуш весиг эз лөгась тайө кывъяссьыс. Сәтшөм сійө вөлі рад, мый батыс бур лызь вайөма. А исласьныс өд велалас.

Повзёдчыс

Талун рыт Аннушлөн бать-мамыс мунісны кино вылө. Нывкалы тшөктöны вöлі петны суседъясö либö Агңия бабыс ордö мунны, но Анна эз көсйы. Шурыс, суседъяслөн детинкаыс, бара эськө дэльөдчыны мөдіс, полысь көчөн нимтыны. Бурджык нин гортас өтнас олас.

И вот Анна өтнас. Ворсны абу окота. Чукөртіс чачаяссö шкапö, мичаа тэчис полкаяс вылө. Пөрччысис, став паськөмсö öшлис улөс бөрвылө, кусөдіс бисö да водіс узыны. Вольпасяс куйлігөн нин нывка думайтіс, мый регыд помасяс кино, вот мамыс воас да мөдас шензыны, кутшөм быдлаті керкаас сөстөм. Чачаяс и паськөм — ставыс ас местаын.

Ойбырмунлі нин Аннуш, и друг кыліс кутшөмкө некор на кывлытөм шы: гирс-гурс, гирс-гурс. Вот öні Аннуш и повзис! Весиг лолавнысö дугдыліс. Топыдджыка эшкыннас гаровтчис, юр вывтйыс шебрасис. Но регыд пөдны мөдіс да бөр ковмис мыччыны нырсö. А көнкө пач дорланяс век: гирс-гурс, гирс-гурс.

Татшөма Аннуш некор на эз повзыв. Весиг эшкын улас йирмөг босьтіс. Дыркодь нин коли кадыс. Гирскөмыс эз дугды. Мый вöчны? И сэтшөм дыр оз помась киноыс.

Друг нывкалы уси дум вылас батыслөн коркөя шулөмыс: колö быть төдмавны, мыйысь повзян. Сэки и полөмыд оз ло.

— А вот чечча да и видзөдла, мый гирскө,— гораа шуис Аннуш.

Медводз колі биасьны. Анна нюжөдіс кисö да бергөдіс выключательсö. Лампочка яръюгыда сывкнитіс бинас став комната пасьта. Гирскөмыс здук кежлө дугдыліс. Сэсся паччөр вывсянь бара: гирс-гурс, гирс-гурс.

Анна вештіс эшкынсö да звирк чеччис. Лыбöдчис паччөрö. А вот кодi вöлөм гирскö! Кысукуыс асланыс! Ворсö тыртөм сакар кудйөн. Небыдик лапанас кудсö паччөртиыс öтарö-мөдарö вешталö. А сакар кудсö Анна ачыс талун лэптис паччöрас, кор аканьясөн ворсны кайлис. А лэччöдныс и вунöдöма.

— Ак тэ, повзьöдчысь!— Аннуш босьтис киас каньöс, лэччöдис паччöрысь да пунктiс кровать вылö ас дiнас. Öни Аннуш нинöмысь нин эз пов.

Ошлы — нитш пинь

Талун Анналөн сөйигөн пиньыс уси. Гольсмунi паньыс пиняс, и турс-торс. А водзынджыксö пиньыс вөрö нин вöли, ёна нин кывнас сiйöс летiс. А век жö забеднö Аннушлы лоис. «Кызд нö пиньтöгыс кута овны? Ставыс öд серавны мөдасны. Да сэсся пиньтöгыд и шушкыль кывъя лоа. Агния баб моз мöда сёрнитны»,— шогсö нывка. Тökөтьö оз бөрд. Синваыс доршасьö.

Но мамыс пыр и бурöдис нывкаöс, эн пö шогсый, выль пинь петас.

— Кысь петас, Агния бабыдлөн тай оз пет!

— А тэнад петас. Шыбит пиньтö гөбөчö да шу:

Вир туп, яй топ,

Ошлы — нитш пинь,

Каньлы — йöv пинь,

Шырлы — яй пинь,

Меным — лы пинь.

— Мам, а мыйла тайö колö шунысö?— юалö Аннуш.

— Мед выль пинь петас.

— А мыйла нö тэ эськö Агния бабыдлы он висьтав тайöс? Шуас кö, гашкö, сылөн быдмас жö выль пиньыс.

— Пöрысь нин сiйö, оз нин сылөн быдмы.

— Мама, а ошкыс мый сөйö?

— Вотос сёйö, турун. Таво тай, вельмöма да, совхоз му вылö гусясьны, зöр сёйны пö быд вой волö.

Аннуш ошъястö картина вылысь да телевизор пыр аддзывліс. «А мед, колök, и нитш пинь петас, лёка гусясьны воывлö,— думайтö нывка,— а вотöстö и нитш пиньнас позьö няклявны».

Каньыслы йöв пиньыс тшöтш лöсялö. А то сылөн пиньыс вывті ёсь. Тöрыт вöлі пышкайöс кутöма да сёйöма. Гөнсö коньöрлысь сöмын кольöма. «Мед каньыслы йöв пинь быдмас. Көть оз кут ышнясьны ёсь пиньнас да лэбачьясöс кутавны»,— водзö мөвпалö Аннуш.

А шырыс...

— Мама, а шырыс мый сёйö?— юалö нывка.

— Шырыс? Быдторсö сёйö: шыдöс и, сукар и... Мый сюрö пинь улас, сійö и гиджгö-йирö,— вочавидзö Аннушлөн мамыс. «Хы,— думайтö Анна, — кызд нö шырыс мөдас сукарсö йирны яй пиньнас? Агния баб тай со пиньтöм да көтöдö-небзьöдö сукарсö чай пиын».

— Мама,— бара шыасис Аннуш,— а шырыс нö эськö чайсö юывлö оз?

— Оз кө-а, эг некор казьявлы,— серöктіс мамыс.

Сідзкö, некызд оз позь сетны шырыслы яй пиньсö, сылы öд сёйны жö колö, думайтö Аннуш.

— Но мый, эн на шыбит пиньтö?— юалö мамыс нывкалысь.— Шыбит öдйöджык. Эн вунöd, мый колö шуньтö.

Аннуш матыстчис гөбöч öдзöс дорö, видзöдліс пемыдас Кысук ветлан розьті, чöвтіс сэтчö пиньсö да вордіс:

Вир туп, яй топ,

Ошлы — нитш пинь,

Каньлы — йöв пинь.

а сэссия ньöжмөдіс гөлөссö да содтіс:

Шырлы — лы пинь,

И меным — лы пинь.

Лөз клянича

«**В**өтлісны, гусясьысьөн нимтісны... И мый налы лөз кляничаыс сэтшөм жаль. Сы мынтасьыс өтитө эз сетны,— думайтіс Анна.— Висьталасны өні ставлы. И гортын, и садйын мөдасны төдны. И суседъяс. Дерт, эськө эз ков босьтны да». Нывка синмын ставыс пемдіс. Весиг еджыд лымйыс синва пырыс кажитчис рудөн. Сійө петіс дзиръяті туй вылө да веськөдчис гортланьыс. «А кори кө эськө, гашкө, и сетісны»,— визьнитіс Анна юрын мөвп.

А ставыс артмис тадз. Анна, садикысь локтөм бөрын, ворсіс ывлаын. Банкаяс пукталіс керка вевт дорысь виялысь войтва улө. Ывла вылыс ёна нин вежсьөма. Сылысь лымйыс ропмунөма-ляпкалөма, көть и еджыдсьыс-еджыд на.

Шур аслас кильчө дорын дзик өтпөлөса бергаліс, мыйкө өтарө пуктыліс син дорас, шенасис. Анна матыстчис сы дорө.

— Анна, волы, волы,— радпырысь корис Шур, весиг өти войт талун эз ышнясь.— Видзөдлы, менам лөз клянича эм. Син пөвтө кунь, а мөднад видзөд сы пыр.

Анна видзөдліс, кызди тшөктіс Шур, и муртса эз горөд чуймөмысла. Гөгөр ставыс вөлі лөз: и лымйыс, и керкаыс, и пуясыс, и Шурлөн нюмъялысь чужөмыс. А сылөн кельыдлөз синмыс лои пемыдлөз. Вештіс нывка син весьтсьыс кляничасө, и ставыс лои ас кодьыс. Бара пуктіс и — гөгөр лөзсьыс-лөз.

— Кутшөм мича! Кытысь тэн тайө сюри?— юаліс Анна.

— А, ваза жугалі...— веськодьпырысь өвтыштіс дөтинка кинас.

— Ваза? А мамыд нө мый шуас?— повзис Анна.

— Эг өд ме жугөд. Рита шкап вылысь уськөдіс. Став-
нас пазьмуні. Кымынкө кляничатор сөмын югді. Лок
көть пыралам, миян гортын нөшта на эм.

Керкаө пырөм мысти Шур вайис картон куд, көні и
збыль лөзаліс некымын клянича. Быд тор Анна босьтліс
киас, видлаліс, видзөдліс на пыр өшиньө. Медся мичаөн
кажитчис лөзалысь лым.

Анналы сэтшөм ёна коліс татшөм кляничаыс, быть
коліс. И сійө өти тор зэв ёна чабыртіс да суйис кисө
зептас.

— Э-э, Анна, тэ тай гусялін кляничасө,— шыасис
Шурлөн ыджыдджык чойыс, Рита, коді велөдчис витөд
классын нин да өні мыськаліс тасьті-пань.

— Ме эг,— муртса кывмөн шуыштіс Анна да ёнджы-
ка чабыртіс кисө. Сійө весиг эз казаяв, мый клянича до-
рышас вундысис ки пыдөсыс.

Шур гөгөрвотөма видзөдіс то чой вылас, то Анна
вылө.

— А ноко кыскы шуйга китө зепсьыд да петкөдлы,
мый сәні,— бара тшөктіс Рита.

— Нинөм абу,— зумыштчис Анна, но кисө эз перйы.

— Нөшта өд и соссьө, а ноко разь кабыртө,— босьтіс
Аннаөс китыс Рита.

Анна паськөдіс чуньяссө. Ки пыдөс вылас куйліс
вирөсь клянича.

— Ки ортөдзыс чабыртөма,— шуис Рита, босьтіс
кляничасө да пожъяліс мыссян доз улын.

— Лок китө мыська да бинтөн көртала,— корис сійө.

Анна матыстчис.

— Гусясьысь, пөръячка, абу яндзимыд,— вирсө мысь-
кигмоз, видчис Рита.— Йөз керкаө локтан да юасьтөг
мыйкө и босьтны лысьтан. Тадзтө сәсся некор миянө эн
лок.

Тайо кывъяссö кылöм бöрын Анна друг нетшышт-
чис места вивсьыс да усъкöдчис öдзöсö.

— Анна, а, Анна,— кыліс бöрсяныыс Шурлөн
гөлöсыс,— на öти клянича тэныд.

Но нывка весиг эз бергöдчыв. Сійö бöрдигтыр котöртис
гортас.

Кысук асныралö

Талун Аннушöс садйысь босьтис Агния бабыс. Ма-
мыс — фермаын, батьсö кытчöкö ылі рейсö мөдöдöмаöсь.
Петісны детсад йöрысь. Ывлаыс шоныд. Лымйыс ста-
выс нин сылöма, сöмын увтасінъясын кольыштöма. Анна
кутчысьöма пöчыслы ыджыд сарөгöсь киас да дугдывтöг
сёрнитö.

— Талун миян воспитательница висьтавліс нянь
йылысь. Няньтö оз позь шыблавны. И нöшта на шуис,
мед ми та йылысь ставлы висьталам. Тэ, Агния баб,
няньтö эн шыблав. Сійöс зэв сьöкыд быдтыныс.

— Ок тэ, шöвктуг, да менö öмöй колö велöдны няньсö
видзны? Ме öд сійöс ас киөн быдтывлі. Вундигад вöлі
быд шепла мышкыртчылам. Кöдзам, быдтам, а сёйныс
вöлі аслыным оз тырмы. Вот ті, том войтыр, энö ышмöй
öнія бур олöмнас.

Тадз сёрнитигтыр найö и воисны горт дорöдзыс. Ан-
нушлы ещö на окота вöлі кодлыкö висьтавны нянь йы-
лысь.

— Агния баб, ме төкөтьö кежлö Шур ордö пырала.

— Дыр эн ветлы.

Шур пукаліс пызан саяс да кыв помсö мыччöмөн
мыйкö гижис.

— Мый ветлан?— дöзмөмпырысь юаліс сійö.



— Висьтавны колё отитор, вот и локті,— збояліс Аннуш.— Миян талун воспитательница беседа нуодіс и висьталіс, мый няньтё оз позь шыблавны. Вот. И колё сёйны ичотик торьясөн.

— Тэтөг тёда.

— А миян воспитательницаыс шуис, мед ми ставлы висьталам.

— Оти-кё, ме ичот торнас ог пёт,— юрсё довкйөдлөмөн висьтавліс Шур,— ме радейта ыджыда шөралөм нянь. Мөд-кё, миян нин учительница кыкысь нуөдліс беседасё, и ме ачым ставсё тёда. Коймөд-кё, вай гөнит гортад, мен урок колё вөчны. Гөгөрвоин? Анна-Ванна, бригадир.

Шур ордысь петөм бөрын орчча йөрысь Аннуш аддзис Иван дедөс, суседсё, коді пукаліс кильчө вылас да куритчис. Анна вуджис потшөссё, матыстчис да пуксис сы дорё, сөмын кык содйөн улөджык. Иван дед пөрысь нин, беддйөн ветлө.

— Иван дед, миян талун воспитательница садйын висьталіс, мый няньтё оз позь шыблавны.

— Оз, оз позь,— довкнитіс юрнас пөль.

— И ставлы тшөктіс висьтавны. Эн шыблав няньтё, Иван дед.

— Ог, Анна, ме няньтö некор ог шыблав. Ме тöда няньыдлысь донтö, нылук.

Иван дед чöв олыштис, кыскыштис гоз-мöдысь чигар-касö да содтис:

— А медся страшнöйыс, Анна, кор аддзан нянь сотчöмсö. Ме сэтшöмторсö аддзылі война вылысь. Украинаысь. А сэнi муясыд абу ми кодбöсь, паськыдысь-паськыдöсь, помтöм-дортöмöсь. И нянь гыалö, воöма нин. Ковмис миян нянь му дорас окопъяс кодйыны. Быд шеп бокö пуктiм, мед оз вош. А немеч öзтис няньсö. И ставыс миян син водзын сотчис. Вот тадз, Аннуш, няньыдлысь ме донтö тöда.

Аннуш казяліс, кыздз пöльлөн чужöмыс нормис да зумышмис.

— Но мун сэсса, ворс,— ыстис сійö нывкаöс.

Аннуш ньöжйöник мөдöдчис гортланьыс. Воис асла-ныс дзиръя дорö да сувтыштис. Кодлы нö эськö нöшта висьтавны нянь йывсьыс? Некод матигөгöрын эз тыдав. Көть эськö Пиль Колялы висьтавны, но сійö Шуркөд öти классын велöдчö, ачыс нин тöдö. Питирим дядьясö пыравны? Но налөн Вугыр нима понйыс зэв курччасьысь. Сидз Аннуш нинöм эз и вермы думыштны.

Пырис гортас. Сыкөд тшöтш брысьнитис-пырис Кысук каньыс да матыстчис аслас сёян дозлань, сэнi йöв пиын вöлі куим нянь тор. Кык торсö Кысук нюм-ням вöчис, а коймөдсö энöвтис. Вешйис бокö, пуксис да мөдiс нювсьыны-мыссьыны. Аннуш уськөдчис сы дорö.

— Кысук, сёй, оз позь няньсö шыблавны.

Кань мыссис, быттö эз и кывлы нывкалысь шуöмсö.

— Кодлы шуи, сёй нянь торсö.

Кысук весиг пельсö эз вөрзбөдлы.

— А, тэ тадзи,— горөдiс Аннуш, босьтис каньöс да мөдiс зурөдны сійöс сёян дозъяс. Но кань нявзiс, нетшкысис, а сёйны эз көсйы.

— Но, эн мучит каньсö, — öлöдiс нывкаöс Агния ба-
быс.

Кысук асныралiс. Анна скöрмис. Медбöрын кань сар-
пыштiс Анналысь кисö да гöбöч розьтi уйкнитiс-пышйис.

— Мый сiйö оз сёй няньсö? Мыйла оз кывзысь? —
шуалiс Анна бöрдiгтыр. Миян воспитательницаыс шуис,
ставлы пö висьталöй, мед некод оз шыблав.

— Да энлы, Аннуш, бöрд. Каньыд öд оз быдтор
гöгөрво, — лөньюдiс нывкаöс пöчыс. — Мед оз кö сёй. Оз
на шыбитсьы öти нянь торйыд. Петкöд пос помö да
чирийшт. Öдйö на гулюяс локтасны да кокаласны.

— Петкöда либö, — век на бöрдöмсьыс сыркъялiг-
тырйи шуис Аннуш.

Агния баб — волшебник

— **М**ама, мыйла Агния бабтö шуöны се-лек-ци-о-
нерөн?

— Кодлысь нö кывлiн?

— Тöрыт на тай папа шуис. Код нö сiйö лоö?

— Селекционерыс — сiйö став быдмөг вылас волшеб-
ник.

— Волшебник?

Анна крöвать бöрвылысь кватитiс ковта, пасьталiс
да котөрөн уськöдчис öдзöсö. «Öдйöджык, öдйöджык, —
тэрмöдлiс сiйö ачыс асьсö. — Öдйöджык Агния баб ордö».

Керкаыс Агния баблөн сулалiс шор сайын, джуджыд
кыркötш йылын. А керка гöгöрыс мыйыс сöмын эз быд-
мы: льöм пуыд и пелысьыд, сус пуыд и ниаыд, сэтöрыд
и öмидзыд.

Анна вуджис шорсö пу пос вывтi да котөрөн сорөн
кайис кыркötш вылö. Муртса на восьтiс дзирьясö Агния
баб йöрас, пыр и горöдiс:

— Агния баб, Агния баб, тэ — селекционер.

— Коді, коді?— веськөдчис Агния баб, коді вөлі град йөрас да весалис ёг турун.

— Волшебник став быдмөг вылас.

— Да, ме волшебник и эм,— серөктіс пөч.

— Волшебник? Мыйла нө либө некор эн висьтавлыв?— шензьө нывка.

— А эн юавлы да.

Вот тайө да. Тайөс нин Аннуш некыдз эз вермы гөгөрвоны. Волшебникъяс йылысь Анналы мамыс лыддывліс мойдъяс, телевизор пыр кинояс видзөдлывліс. Но Агния баб и — волшебник? Но и но.

— Лок, ме тэныд мыйкө петкөдла,— шуис Агния баб да мөдөдчис пывсянланьыс. Анна чеччалигтыр вөччис сы бөрся.

Пывсян дорас, лунвывланяс, вөлі торъя град йөр. Сэні быдмис өти сус пу (тайө пашкыр лыска пусө Анна төдіс нин) да нөшта куим вөсньыдик корья пу. А өти пу вылын, медся ыджыдыс вылын, дзоридзалисны ичөтик еджыд дзоридзьяс. Öтик, мөд, коймөд... А кутшөм чөскыд дукаөсь тайө дзоридзьясы!

— Агния баб, мый тайө?— гусьөн юалис Аннуш.

— Яблоня.

— И яблөгъяс быдмасны?— чуймис нывка.

— Оз кө кынмы, дерт, быдмасны.

— А мян воспитательница детсадйын висьтавліс, мый мян войвылад яблөгыд оз быдмы.

— А ёна жө лоө дөзьөритныд,— нюмъөвтис Агния баб.— Төвбыд майшаси, мед оз кынмы. Воддза төвнас идзасөн вевттявлі вужьяссө, да шыръяс вөлі килльөмаөсь, а колян арнас коз лыс вөрысь ваялі да сійөс пукталі, а сэсса лымйөн тырталі. Вот сідзи и төвйөді. Арнас медводдза яблөгъяс мөдам сёйны тэкөд.



— Агния баб, тэ тай збыль волшебник вёлөмыд,— тыр синмөн видзөдіс нывка пөчыс вылө. А сэссия чинтіс гөлөссө да юалис:

— А тэнад волшебной палочкаыд эм?

— Эм, быдса дас.

— Дас? Меным өтикөс сетан?

— Ог. Тэнад өд аслад эмөсь.

— Менам? Көні?

— Чуньясыд нө?

— Да, бара нин ме вылын шмонитан,— гажтөммис Аннуш.

— Ог, ог шмонит, нылук, киясыд быдтор вермөны вөчны. И керка лэптыны, и трактор вөчны, и нянь быдтыны.— Сэссия неуна чөв олыштөм бөрын содтіс: — Сөмын колө кужны найөс уджөдны.

Аннуш топөдчис пөчыс дінө:

— Ме мөда тэныд отсасыны.

Чошөяслы пөлать

Талун асывнас Анна кыліс мам-батыслысь тешкодь сёрни. Мамыс шуис:

— Порсь гидас ваис ёна кутіс өкмыны. Вольөс ни нинөм оз отсав. Джоджавнысө өні, страдна кадө, некор, а узылынысө көть чошөясыслы пөлать колө вөчыштны.

— Удж бөрын мастеритышта. Чайта, ритпомөн и эштас. Пөвъясыс эмөсь,— эскөдіс батыс.

Анналөн и вомыс калькмуни, сэтшөма чуймис. Порсьлы пөлать? Асланыс налөн пөлатыс эз вөв. А аддзывліс сійөс Агния баб керкаысь, весиг кайлывліс сэтчө. Пөлатыс вылын, пөтөлөк дорас. Медводз паччөр содті каян, а сэссия пөлатяс вуджан. Но порсьяслы пөлать?

Өдва вермис Аннуш виччысьны рытсө.

Петісны ая-ныла порсьлы пöлать вöчны. Бөрйисны пöвъяс, мерайтісны гидлысь кузьтасö, да сы кузьтаö и мөдіс батыс пöвъяссö пилитны. А Аннуш сы гөгөр бергалö, отсасьö, кутö, мед местасьыс оз вешйыны.

— Пап, а нöшта на öд и содъя пу ковмас вöчны?— эз вермы терпитнысö да юалис Аннуш.

— Кутшöм содъя пу?— шензьö батыс.

— А порсьясыдлы пöлатяс кайны.

— А,— серöктіс батыс,— найö содъя путöгыс каясны.

Кыздз нö найö, коньөръяс, каясны сэтшöм вылөсö? Кокъясыс öд налөн сэтшöм дженьыдөсь!

Аннаяслөн гидас кык чошö: Гөрд Ныр да Кузь Ныр. Радейтö нывка пыравлыны на дорö, то турун пыртыштас, то мамыскөд öтвылысь юкталас. А медся ёна, тайöснин Анна төдö, радейтöны найö воййыв турун да йөн.

— Папа, а мыйла порсьясыслы пöлатьыс колö?

— Мамыд тай шуö, гидыс пö ва да няйт.

— Порсьясыслы öд ваыс да няйтыс и колö, век тай няйт гуранö пырöны.

— Ок тэ, Аннуш, нинöм тай он вөлөм төд аслад другъяс йылысь. Ваас найö пыравлöны жар лунö да лөддзаномъя кадö. А сідзсö зэв на и радейтöны сөстөмлунсö. Став гидсö найö оз лякөсьтны, öти пельөсö ветлöны. И узьны радейтöны векджык öтилаын, косінын, кос вольөс вылын. А кор көдздөдас, вольөс пиас пырöны, чом кодь вөчöны аслыныс. Зэв төлка пемөсьяс.

— А мыйла нö либö миян садъяс воспитательницаыс шуö Игорыслы, порсь моз пö сёян.

— А Игорыс мый, лёка сёйö?

— Став дөрөмсö и пызансö лякөсьтö.

— А тэ öд аддзывлін, кыздз порсьясыд сёйöны. Кузь Нырыд водз кокнас воръяс пырö. Сійөн и шуöны няйта сёйысьястö порсь кодьөн.

Регыд пөвъяссө пилитсис. Анна новліс найөс гидө. Батыс мастеритіс чошөяслы пөлать, да эз вылө, пөтөлөк бердас, а улө, джоджсьыс кык чунь вомлөс и лэптис.

А Анна, мед чошөясыс эз мешайтчыны батыссы, петкөдіс найөс йөрө. А налы любөйд! Ризъялөны Анна бөрся да руксөны. Сэссия Аннуш пыртис гидас кос вольөс да разөдіс выль пөлатяс. Мед бура узясны косінын чөскыд дука турун вылын нывкалөн нель кока ёртъясыс: Гөрд Ныр да Кузь Ныр.

Кодзувкотъяс

Аннуш сөмын на пырис садикө, кыз сійөс пыр жө паныдаліс Павлик.

— Көсьян, мыйкө петкөдла?

— Петкөдлы,— вочавидзис Аннуш.

Павлик кыскис зепсьыс истөг куд да ичөтика восьтыштіс.

— О, кодзувкотъяс! Кытысь нө найө?

— Төрыт ми батькөд вөрө кайлім да сэтысь ме аддзи зэв ыджыд кодзувкоткар. А кодзувкотыс мыйта! Сөмын жуөны. Ме татчө бедьторйөн и йөрти некымынөс. Вот,— ошйысис Павлик.

Воспитательницаыс, Надежда Петровна, матыстчис на дінө:

— Челядь, мый лои?

Вочавидзис Аннуш:

— Сійө кодзувкотъясөс вайөма. Вөрысь лэччөдөма төрыт...

— Кодзувкотъясөс? Найөс, челядь, оз позь вөрөднытө. Найө зэв коланаөсь. Сы вөсна мый кужөны бурдөдны вөрсө быд сикас висьөмысь, мездөны пуяссө да мукөд пөлөс вөрса быдмөгсө уна лөк гагйысь.

— Ме ог вöлі тöд, мый найöс оз позь босьтнысö,—
бöрддзис Павлик.

— Колö найöс истöг кудсьыд бөр лэдзны,— шуис
Надежда Петровна да муніс мукöд челядь дорö.

Аннуш босьтіс детинкаöс киöдыс да пöся мöдіс
шöпкöдны:

— Павлик, колö кодзувкотъястö бөр вöрас нуны.
А то татчö кö лэдзам, туйсö асланыс кодзувкоткарö оз
аддзыны. Кор ывлаö ворсны петкöдасны, сэки ми тэкöд
и нуам. Но?

— Но,— видзöдліс детинка Аннушлөн гырысь лöz
синъясö.

Ывлаö ворсны петігөн Павлик суйис истöг кудсö гач
зептас. Йöрын челядь медводз дзевбисны пуяс сайö, сэс-
ся потшöс коластті петісны детсад йöрысь.

Сулаліс мича гожся лун. Шондіыс яра шонтіс мусö.
Керкаяс сайö дзевбсьышталöмөн, мед эськö оз жö бөр бер-
гöдны найöс, Аннуш да Павлик тэрмасьöмөн котöртіс-
ны сикт кузя, сэсся картопель муяс дорті.

Медводдза пуяс дорас матыстчигөн челядь ышкиг-
пошкигтыр сувтісны.

— Көніджык кодзувкоткарыс?— юаліс Аннуш.

— Эстөн,— индіс Павлик вөрлань.

— Мунам öдйöджык,— тэрмöдліс Аннуш.

— Ме ог лысьт,— шуис детинка.— Гашкö, сэні кöинъяс.

— Кöинъяс,— повзис Аннуш. Но пыр жö вötліс
полöмсö.— Но и мый? Тöрыт ті энö аддзылöй найöс?
Сідзкö, абуöсь.

— Ме öд тöрыт батькöд ветлі, а сылөн тасма костас
чер вöлі суйöма,— вочавидзис Павлик.

— Павлик, а вай либö татчö лэдзам. Тасянь найö,
гашкö, аддзасны нин туйсö.

Детинка да нывка пидзöсчанясисны веж турун вы-
лас, восьтісны истöг кудсö да пуктісны муö. Кодзув-
котъяс мöдісны вөрны, сэсся петісны.

— Вот ті кӧнӧсь!— кылісны челядь бӧрвывсьыныс горӧдӧм шы да повзьӧмпырысь бергӧдчисны. Наланьӧ, сьӧкыда лолалігтыр, матыстчис Надежда Петровна.— А вӧрас кӧ пыринныд да вошинныд?— воспитательница лӧччысис турун вылӧ челядькӧд орччӧн да топӧдыштіс найӧс ас дорас.

Челядь чӧв олісны. Турун пиын кодзувкотьяс надзӧникӧн сьӧрсьӧн-бӧрсьӧн кыссисны вӧрлань.

— Но и бур, бобукъяс,— шуис Надежда Петровна.— Мед вӧля вылас олӧны. А тіян колі висьтасьны, мый татчӧ мӧданныд. Ми эськӧ став челядькӧд ӧтвылысь кайлім вӧр дорӧдзыс. Ӑні вайӧ детсадъяс лӧччамӧ. А то ӧбед вылад сӧрмам.

Найӧ куимнанныс кинаныс кутчысьӧмӧн мӧдӧдчисны сиктлань.





ШУНДЫР

Мойд

Ылын-ылын, Печораё усьысь Паль юбердса öти грездын олісны-вылісны пöрысь гозъя. Ёна найö шогсисны да Енлы кевмысисны, челядьныс эз вöв да. Сиктын сёрни-басни лыблі: Маланняя пö вомдзалöма, пöльыс том дырйиис абу сы вылö гöтрасьöма да.

Со коркö-некоркö и Ен пельöдз пöрысь гозъялөн кевмöмыд воöма: чужис налөн пи. Гöгинявнытö бара лои Маланняятö корны: мöд гöгинь пöчыс сиктын абу. Пи чужис, Ен сыкöдөн, бласлöвöйся. Зэв нимкодь гозъялы — лун и вой вомныс шешмунöма. Нимсö пунктисны Шундыр. Быд здук матыстчылöны потан дорö, видзöдлöны, кызди нин налөн пиукныс быдмö.

Коли тöлысь, мöд, коймöд, а пиукыд оз быдмы. Коркö и быдса во коли. Арöса кага моз кок йылö сувтіс, эньсö-

айсö тöдö, мыйсюрö и шуышталö нин ас ногыс. А туша-
ыс век чужöмсяыс кодь, оз ту. Ас кадö сёрнитны велалі,
тшöтшъяяс мозыс жö вежёрсялö, а век дзоля. Эз и быд-
мы Шундыр: кутшöмөн вöлі, сэтшöмөн и коли.

Тэрыб, вöй, збой, варов, сöмын ичöт. Вөркань кодь
визув да ур кодь пельк: то паччөрö кайлас, то пöлатьö
вуджалас. Öнi на лабич кузя öтарö-мöдарö шуркъяліс, а
видзöдан да, сёрйö нин кутчысьöма, бовъялö. Ланьтлö
сöмын узигас да кор öшинь вылö пуксьылö. Ывлаö
видзöдигөн сöмын и ылавлö. Дыр пукалас сэнi да мöвпа-
лас мыйкö ассьыс. Окота сылы петавны керкаысь,
видзöдлыны гөгөрбок да тöдмавны, мый сэнi, водзынсö.

Ывлаас пинысö пöрысь гозъя оз лэдзлывлыны: полöны
воштöмысь. Мый нö, татшöм ичöтыд, турун пиö пырас
да и ылалö. Вывті тэрыб Шундырыд, пöрысь гозъяыд оз
вермыны сы бöрся вöтлысьнытö. Керка пыткас на вош-
лас, да гозъялы юр кушмытöдзыс корсьны лö. То шкап
сайö дзебсяс, то картупель чугун сайö. А öтчыд вöлі
пачводзö кайöма да унмовсьöма сэтчö, рытнас, пачö пес
сюяліг, вöлисти сюри. Коркö ва тыра ватланö буз уси да
муртса эз вöй. Кытчö нин ывлаö лысьтан лэдзны. Пыв-
сянö сöмын лэччöдлывлöны питшöгас, пывсьöдасны-ко-
рöсяласны гозъя да бөр катöдасны.

Сідзи и олöны-вылöны. Оз быдмы пиукныс, да ёна
эрдö оз и лэдзлыны сы йылысь юöрсö. Маланнясö на
өлöдісны, эн пö висьтавлы йöзыслы миян пиук йылысь.
Оз пö быдмы, да сідз нин гусьöндзи видзам, мед оз дэльöд-
чыны.

Öтчыд коркö Малання чожныс пукавны волас да шуас:
ті пö коньөр Шундыртö шонді водзö эн петкөдлывлöй,
да гожсайса нэр турун моз пö сійö эз и быдмы.

Мöвпалісны-мöвпалісны гозъя, гашкö пö и сідз.
Збыльысь öд эз петкөдлыны шонді водзö. Вай пö петкөд-
лам.

Керка дорсьыс турунтö ытшкисны, мед турун пиö Шундыр оз вош, вольсалісны эшкын да сэтчö и пуксьö-дісны пинысö. Дөрөмтіыс вөнъөн көрталөмаөсь, мед ылö оз пышйы. Гозъя орччөнөсь, видзөдöны. Вис нима каньыс на дорын жö куткырвидзö.

Жар гоҗся лун. Гуньвидзöны-пукалöны эшкын вылын, пöҗсьöны яр шонді улын. Коркö и ониш босьтіс пöрысь гозъятö, очсөдлöны öта-мөд веҗмөн, тайкö вомкаличныс оз чеччышт инсьыс. Сэсся и унмовсисны кыкнанныс. Мыйөн тайөс Шундыр казяліс, дыр эз майшась, дөрөмсö пөрччис да эшкын ылö павҗис, а вөнсьö разис да көрталіс каньлы кокас. Ачыс керка сайö котөртіс, сэсся пывсян сайö, и вöля вылын лои. Гөгөр виҗъяюра чача дзордзалö, веҗ турун туö-быдмö. Вильчикасьö-котралö Шундыр нимкодъысла. А гозъя нистöны-узьöны, коркö садьмыласны, трук-трак вөнъ зэлöдыштласны: тані дона пиукныс. Сöмын кань нявөстлөм шы кывлас.

Садьмисны коркö шонді лэччөм бöрын пöрысь гозъя, а Шундырыд абу. Каньөс, вөлөм, коктіыс тракйöны. Ок и повзисны гозъя, ыдҗыд шумö воисны, комын во öтлаын олöны, да медводдзаысь бон-бус пинясисны. Öта-мөд вылас ыстысьöны, коді водзджык унмовсис. Мыжаөс ас гөгöрыс корсисны-корсисны да сэсся путьмисны жö, писö корсьны уськөдчисны. Став матігөгөрсö кытшовтісны, некытысь Шундыр эз юҗды. Код төдас көні сійö. Бөрдöны пöрысь гозъя, шогсьöны ёнасьыс-ёна. Керка гөгөр корсисны, пывсян дор, суседъясö петалісны — некөн абу.

Сідзи и воши Шундыр.

А зонкалы нö мый? Оз на гөгөрво, мый мам-батысылы шог вайис. Ризъялö-котралö турун пөвстті, йөзлы оз и тыдав, дзоридзьяскөд өтвесьт лоö Шундыр. Котраліс-котраліс, и туй кузя, и туй вомөн, мудзтөдзыс лои. Друг казяліс, кодкö сы ылö видзөдö. Ой, кутшөмкö повзьөдчысь! Съөд сук гөна, паськыд ныра, мегыра сюра, вөсни кока.

Татшөм дивөсө Шундыр некор на эз аддзыв. Ок и повзис, пышйыны мөдліс, а повзьөдысьыс вөтөдіс да бара дзоргө сьөд синнас. Сэссия вөсни кокнас чапыштіс да сюрнас люкыштіс. Шундыр тімбыльтчис турун пөвстас да ёна и скөрмис, вирыс пузис. Чеччис, матыстчис да кутчысис повзьөдчысьыдлы гөнас. Мөдыс ачыс повзис да гуп-гуп мөдіс котөртны, а Шундыр сідзи и өшалө гөнас кутчысьөмөн. Лэччысьнысө оз лысьт, мед бөр кок улас не веськавны. Сэссия гөнас кутчысьөмөн вывлань кавшасис, пуксис мыш вылас да сюрас и кутчысис. Меж тайө вөлі. Пукалө Шундыр мыш вылас, гөгөр видзөдө: кутшөм ылөдз тыдалө. Туруна да дзоридза веж луд, шуйгавылын вөр, а веськыдвылын ю тыдалө. Меж котралө, бөр кокнас чеччыштлас быдөн, мыш вывсьыс уськөдны көсйө Шундырөс, но оз вермы. Сідзи и лои ыж чукөркөд гидө пырны. Тадзи Шундыр меж мышку вылын веськаліс орчча сиктө, ыж гидө.

Ыж чукөрлөн месаньыс эз и казьяв сійөс: лэччөдіс ведра помөй, кисьтіс ворйө да бөр гортас кайис. Ыжъяс чурскөны-юөны, тяпкөны-сөйөны, а зонка тшыг коли. Кор ыжъяс водалісны узыны, Шундыр вөлись лэччис меж вылысь, матыстчыліс сөян вор дорө, но дозйыс вөлі куш. Вор дорас сөмын кык нянь тор уськөдөмаөсь, да сійө вомас суйыштіс, а сэссия дзоляыдлы уна-ө и колө. Корсис ыж чукөрысь төдса межөс, код мыш вылын лунтыр гонняліс, и нюкыртчис сы дорө, шоньд гөн пиас нырсө суйис да унмовсис. Сэтшөм чорыда узис, весиг эз казьявлы, кор асывводзнас ыж чукөрыд мунөма йирсьыны. Садьмис Шундыр гидын өтнас. Горшыс косьмө. Ворйын нинөм абу, асья сөянсө бара кушөдз чурскөмаөсь-юөмаөсь. Өдзөс пөдса.

Кыз нө пельк да вөй мортлы, Шундырлы, лунтыр овсяс гидын. Өшинь розьтыс и төрөдчис-петіс, уйкнитіс-муніс. Видзөдалө гөгөр: ставыс төдтөм, мый нө, мөд сик-

тын да. Гожом шөр, гөгөр онялө, ва войт некөн абу. Зонкалөн зэв ёна горшыс косьмө, вомас дуллыс нин эз коль.

Друг сійө руksыштөм кыліс. Муніс, видзөдө: кодкө зэв ыджыд куйлө, руksө, а сы кынөм гөгөр посни пияныс гартчөны, нень корсьөны. Шундырлөн нёнясьө-мыс абу на жө вунөма, да и вывті нин ёна горшыс кось-мис. Пырис сійө йөрө, поснияс дорас водіс, корсис өти нень да сэтчө и ляскысис. Сэтшөм чөскыд кажитчис порсь йөлыд, пөттөдзыс нёняліс да и унмовсис.

Недыр мысти месаньыс порсьыдлы юны лэччөдас да и аддзас Шундыртө. Сэтшөма повзяс, горзыны пондас: ояя да ояя пө, волөй бур йөзөй, видзөдлөй, видзөдлөй, порсьыд менам морт кодь пи чужтөма.

Чукөртчасны пөрысь и том. Дивуйтчөны: порсьыд морт кодь пи чужтөма. А шумыд, гажыд! Лыбзьө ставнас сиктыд. Шундыр узьө, вомас порсь нень босьтөма да нинөм оз кыв. Коркө йөзыд смелмөдчисны да и босьтісны сійөс нень дорсьыд. Сэки вөлісь садьмис Шундыр, синсө восьтіс да шуө: «Ой, кутшөм дыр узьсьөма!» Йөзыд тшөк ланьтісны. Со өд дивөыд! Сёрнитө! Пөльяс-пөчьяс пернапас чөвтісны: мый дыра пө олам да татшөм дивөсө эгө аддзылөй. Со өд мый вермас лоны: польөпи морт моз сёрнитны кужө!

Сэсса бара йөзыс гызисны: мый нө пө ми такөд мөдам вөчны. Öтияс шуөны: колө сотны, тайө урөс водзын. Мөдьяс шуөны: став ловья лолыс Енлөн сетөмтор, мед олө. Татшөм ичөтыдлы уна сёян оз ков, быдтам став сиктөн өтвылысь, вежонөн-вежонөн мөдам видзны. А месаньыс, кодлы медводз Шундыр сюри, шуө:

— Некодлы ог сет, ачым быдта, колөкө, кутшөм меным шуд ваяс либө озырлун,— босьтіс Шундырөс да и пыртөдіс гортас.

Озырлун и вайис Шундырыд. Быдөнлы окота видзодлыны дивө вылад, а мөгтөг өд он пыр йөз керкаад. Со и вайоны месаньыслы: коді порсь гос, коді яйтор, коді черитор, коді выйсука рач, коді вурун, коді шөрт тупыль. Нурторйөн кө пыран либө эмбур содтөд пыртан — месаньыд меліджык, оз вөтлы. Шундыр бура олө, ёнмөсөвмө лунысь-лун, но оз быдмы. Бөратлас¹ эськө, көнкө пө менам ай-мам выйимось. Сы вылын сералөны, порсь вылө индөны, со пө тэнад мамыд, а айыд важөн абу.

Гортас ай-мамыс Шундырлөн шогалөны, лун-лун бөрдөны: сетліс пө Ен миянлы питор, да бөр босьтіс. Көркө и на пельөдз воас: орчча сиктын пө порсь чужтөма мортөс. Пөльлы да пөчлы тшөтш окота лои видзодлыны татшөм дивөтө: вөччисны-пасьтасисны, гөстиндзи босьтісны и мөдөдчисны орчча сиктө.

Пукалө Шундыр өшинь вылын да висьталө:

— Айө да энью менам локтөны.

Сы вылын бара сералөны: локтас пө порсь да пырас керка шөрө.

Пырисны пөль да пөч, Шундыр на дөрө уськөдчис:

— Видза олан, айө! Видза олан, энью!

Пөрысь гозья швуч-швачкерисны кияснас:

— Шундыр, сё зарни пи, өтка пи, тэ нө тани?

Кутчысьлісны да окасисны, гортө пө мөдөдчам.

А месаньыд оз лэдз. Тайөс пө менам порсьөй чужтіс, дас кыкөд пиыс польөлөн. Тіянлөн пө некор некод эз вөвлы, некутшөм пи ни ныв. Ог сет и ставыс.

Ковмис пөрысь гозьялы куш киён гортас мунны да Малань пөчлы копыртчывны, корны:

— Ветлам, Малань, тэ өд гөгиньыс, висьтав, мый Шундырыс миян пи.

¹ Бөратлас — казгыштлас.



Ветліс Маланьыд, висьталіс, чужтыліс пö тайö пöчыс пиös, но оз быдмы да йöзыслы эз и петкöдлыны. Сэсся и Шундырыд висьталіс, кызди сійö порсь дорад веськаліс.

Эскис месаньыд да сетіс Шундыртö. Ковмис пöль-пöчлы, дерт, сепыс пызь нуны. Мый дыра пö ме сійös верді, месаньыд шуö. Ачыс эськö Шундыр весьтö и оліс, да ассьыс семьясö на вердіс, став сиктсаыс сёян-юансö ваялісны. Да öд он мöд сэсся артасьны, татшöм шуд нин уси пöрысь гозьялы: бөр пиукныс югдіс. Питшöгас суй-ис пöльыс Шундырös, да и гортас мöдöдчисны.

Бара зэв бура мöдісны овны. Шундыр ёнмö, вежöрыс содö лунысь-лун, но век ичöтик. Дыркодь тадз олісны, но воис кад, пöльыд ёнакодь пöрысьмис, эз мöд вермыны немтор вöрысь-ваысь вайны. Шогö усиньы гозья: кызд нö мöдам овны. Асьным пöрысьмим, Шундыр дзоля, кыйсьыны оз вермы.

Шундыр кыліс ай-мамыслысь шогсьöмсö да мöдіс вöзйысьны:

— Нуöдлы, айö, менö чери кыйны.

— Ог,— шуö айыс,— тэ öд, татшöм ичöтикыд, ваас усян да вöян. Ог босьт чери кыйны.

Лун-мöд коли, бара вöзйысьö Шундыр:

— Айö, нуöдлы менö чери кыйны.

Эньыс кылöма, варыш моз уськöдчис:

— Он лысьт нуöдны, дзолукыд тельснитчас ваас да кутнытö он вевъяв.

Вежон-мöд коли, бара вöзйысьö Шундыр:

— Нуöдлы, айö, менö чери кыйны.

Пöчыс эз вöv гортын, и босьтіс пöль Шундырös аскöдыс.

Лэччисны найö вадорö, бötьяс пуктісны пыжö, Шундыр пуксис пыж нырö, мöдöдчисны найö ю катыд.

— Дорышас ёна кутчысь,— велöдö айыс.

— Ог усь,— шуö пиыс.

Катоны джуджыдінті, айыс пелысөн сынө. Шундыр юалө:

— Айө, таті джуджыд-ө?

— Ме ог подйы, а кысь нин тэныд.

— Айө, а мый сэні, ва пыдөсас?— окота төдны зонкалы.

— Ме эг аддзыв, а кысь нин тэн,— вочавидзө айыс.

— Он кө видзөдлы, он и аддзыв,— шуис Шундыр да тольс ваад чеччыштіс, дзумк уськөдчис медся джуджыдінас.

Пөльыд эськө судзөдчыліс жө сыла, но кытысь босьтан. Уөвтіс Шундырыд — и абу.

Бөрдіс да бөрдіс пөльыд, чуксаліс да чуксаліс пуксө, шогсис да шогсис, видіс да видіс асьсө: мыйла и босьтіс писө вадорас. Кутшөм нин сэні чери кыйөм, куш киөн гортас косіс.

Гозъя ырзөмөн бөрдөны, дона пинысө жалитөны.

А Шундырыд вөлөмкө чери моз уявны кужө. Дзумгысис ваад да уялө, гөгөр видзөдалө. Чериыд джуджыдінад лыдтөм-тшөттөм! Видзөдө: ставөн өтилаө уйөны. Вожасис Шундыр ыджыд сир вылө, чери бордъясас кутчысис.

Нильөг эськө бордйыс, вот-вот кыис вильснитас, но мый вынсьыс шашаритчис, эз лэдзчысь.

Уөвтіс сир чериыд кутшөмкө бужөд улө, а сы сайын зэв мича царство воссис. Уна рөма изъясысь да ракпаньясысь лэптөма-лөсьөдөма. Быдсяма пөлөс ваувса веж турун быдмө, му вылас сэтшөмыс абу. Кок улыс, пыдөсыс, ставыс жө изйысь.

Мынтөдіс Шундыр кисө сир бордъясысь да сувтіс изъяс вылас. Видзөдө гөгөр, шензьө. Вөчис воськов-мөд да вильдіс, муртса нюйт пиас эз шляпкысь. Зэв эськө мича гөгөрбок, но ставыс нюйт, вильыд. Изъясыс сэтчөдз шылялөмаөсь, исласьны позьө. Öдйөдчис Шундыр да ис-

ковтіс. Зэв өдйө нуө, веж нуйтыс сөмын резсё өтарө-мөдарө. Гоз-мөдысь йөткыштчис кокнас да воис джуджыд дзирья дорө. Öдзөс кольчаас нуйт жө, нильөг. Восьтіс өдзөссө, а сәні зэв ыджыд жыр, ставыс чериөн да лёльөөн тыр. Шөрас, джуджыд джек вылын, зэв мисьтөм пөль пукалө: ваувса туруныс кодь жө турунвиж, плешка юра, лапья пеля, синмыс гөгрөс да гөрд, кельчилөн кодь, ныр-вомыс пасьмунөма, лягейлөн кодь, ки-кокыс кузьмөс, нидзув кодь. Ок и мисьтөм!

Кузь нуйт тошкыс сөмын и петкөдлө, мый тайө пөль.

— Тэ али мый Васаяс лоан?— горөдіс Шундыр.

— Коді тәні?— юалө Васа.

Ичөт зонкатө нуйт письыд оз и аддзы.

— Ме, Шундыр,— висьтасьө.

— Код нө сэтшөмыс лоан?

— Аслам ай-мамлөн пи,— ярскөба вочавидзис Шундыр.— А тэ коді?

— Тэ менө он төд?— ырыштчис сы вылө Васа, а сәсся мышкыртчис да колснитіс-печиктіс Шундырлы кы-мөсас.

Шундыр сэтшөма скөрмис: өд сійөс чунь помөн не-код эз вөрзөдлы, а этайө полөкалөыс лысьтіс! Кватитіс нуйтсө да шлапкис Васаядлы чужөмас, кельчи кодь синмыс сылөн тыри. Мөдысь шыбитіс, да мөд синмыс тупкысис. Нинөм оз аддзы.

Горзыны мөдіс Васаяд:

— Кутөй Шундырсө да пыдзыртөй!

Уськөдчис зонка вылө став ваувса олысьыс: чериыс и мутиыс, лёльөыс и вегыльыс.

Шундырыд өд збыль ур кодь пельк, чеччыштіс веськыда Васаядлы пельпом вылас да ныр увсө гильөдыштіс. Васатө несйөдлыны мөдіс, некыдз дугөднысө оз вермы. Шундыр сылысь пель лапөдсө ләптыштіс да сәтчө зэв гораа горөдіс:

— Васа, Васа, черитö вай!
Чур-чермуні Васа, джудж-
ыд джек вывсьыд клёнмуні
изъяс вылө. А Шундырыд
сійос бара нин нюйтөн коялө
да горзö.

— Васа, Васа, черитö вай!
Зэв ёна скөрмис ваувса
сарыд, дурпоп моз мөдiс бер-
гавны, инас оз öшйы, гу-
дыртіс став васö. Некод
нинөм эз мөд аддзыны,
нинөмөн лои лолавны. Ачыс
Васаыс мөдiс пöдны, ог нин
шуö Шундыр йылысь. Лыбөд-
чис Васаыд васыыс, мед ло-
лыштны, а Шундырыд пель-
пом вылас вөлөм сулалө,
йөткыштчис кокнас да уй-
ыштіс береглянь. Мыйөн воис
косінө, бара горөдiс:

— Васа, Васа, черитö вай!
Сьöлыштіс веж дулльөн
Васаыд, он жö пö нин таысь
мын, да лыйис öти ыджыд
чериөн Шундырлы. Мөдыс нө
мый, оз öд кут виччысьны,
кор сылы инмасны, чеч-
чыштіс бокö. Босьтіс черисö
Шундыр, ас ыждаыс жö,
гортас кыскö, öдва вермө.

Коркö и воис Шундыр
гортас, а сэн пöрысь гозъя
бөрдöны. Пырис да шлоп че-
рисö лабич вылө пуктіс:



— Но, эн бөрдөй, а чери ва пуёй.

Кутлалісны да окалісны Шундырөс пөрысь гозъя. Нимкодясьоны, бөр пиыс гортас воис да, нөшта на и прөмысөн. Тайө лунсянныс Шундыр мөдіс чериөн пөрысь гозьяөс вердны. Лэччас ю дорө да горөдас:

— Васа, Васа, черитө вай!

Чериыд ачыс локтө Шундыр дорө, гумовт, уна-ө колө. Шудаа мөдісны овны Шундыр да пөрысь гозъя, пөтөса.

Коркө-некоркө Шундыр мөдіс вөрө вөзйысьны.

— Нуөдлы,— шуө,— айө, менө вөрө, велөд кыйсьыны.

— Мун!— шуө айыс.— Кутшөм тэысь вөралысь, пищаль лэптыны он вермы, көчпи тэысь ыджыдджык лоө, ог нин шу ош йылысь.

Дыр-ө, регыд-ө кадыс коли, бара вөзйысьө Шундыр:

— Нуөдлы, айө, вөрө, велөд кыйсьыны.

— Чөв, ланьт,— өлөдө сійөс пөль,— вөрас вошан.

Ачыс пөрысь нин вөлі да матигөгөр вөръясө сөмын петавлө, сьола вылө лэчьяс окталө.

Коймөдысь вөзйысьө Шундыр:

— Айө, он кө катөдлы, ачим кая.

Повзис пөль, мый пиыс төдтөг-кужтөг мунас вөрас да вошө. Босьтис аскөдыс, велөдіс ветлөдлыны вөрти да лэчьяс октавыны. Шундыр зэв писькөс вежөра, пыр и велалі. Зэв нимкодь лои айыслы.

— Но, асыв ачыл и ветлы кыйдөсысла, шедө оз мыйкө. Да ылө эн мун, гөгөрт талунъя туйсө — и гортө.

Көсйысис Шундыр.

Мөд лун гөгөртис дзоля морт лэчьяссө — нинөм абу веськалөма. А тыртөм киөн абу окота лэччыны гортө. Мый и вөчны? Муніс Шундыр прөмыс корсьны. Ветлөдліс, ветлөдліс, некодкөд эз вочаась. Дышөдіс вөртиыс шлонъявны — мөдіс сійө ворсны. Кавшасяс пу йылө, сэсса лөсьөдчас да кутшөмкө ув вылө өшөдчас-

бовкнитчас да өдйөдчөмөн мөд пу вылө чеччыштө. Өшалө тадз ки вылас өти кыз ув вылын, видзөдө: кутшөмкө пемөс чеччалө-локтө. Ачыс руд, кузь пеля. Көч! Шундыр весьтө и сувтис, пельяснас вөрөдө. Кывысьө. Шундыр дыр эз и мөвпав, чеччыштіс сы вылө да пеляс и кутчысис. Көч повзьөмвыивсьыс — гөнеч! Пышйис да пышйис синсюра мөс моз кытчө веськалө, кытчөдз сьөлөмыс коньөрлөн повзьөмысла эз пот. Бур, мый сикт дорө матө уси. Ылісяньыд эськө эз вермы Шундыр көч тушатө кыскыны. Вайис гортас. А пөрысь гозьялы нимкодъыд! Со өд пиукныс, дарөм дзоля да, көчөс кыйөма! Айсө-мамсө вердысь быдмис! Нимкодъыс вом пырыс петө, нюм оз и ямлы пөрысь гозьялөн. Көч яя шыд сөйөны, тяпкөдчөны чөскыдысла да пинысө ошкөны.

А зонка оз радлы, сійө өд гөгөрвоө, мый мөдысь тадз көчыд оз шед, а мөд ног кыйсьыны оз вермы. Колө мыйкө мөвпыштны, өд мам-батыс воысь-во пөрысьмөны. Юр жуглө-пуктө. Сідзи и унмовсис.

Мөд асыв чеччис, сөйыштіс да бара вөрө муніс. Эн пө шогсьөй, гашкө, дыр ог во. Мунө да мөвпалө: «Васа дорөдз волі да лои чериа, а гашкө, инө, Вөрса дорө колө ветлыны». Шуөма — керөма. Мөдөдчис Вөрсаөс корсьны. А кытысь сійөс аддзан, вөрыс со мый пасьта. Муніс-муніс, да керка воис. Веркөвөй¹ олысь кодкө. Матыстчис да аддзө: кильчөыс киссьөма, пырнытө он вермы. Шундырыд пельк, видзөдліс гөгөрбок: өтилаті тотш-тотш вөчис, мөдлаті йирк-грым ладмөдіс, коймөдлаті дзурлик-дзорлик лөсьөдіс — кильчөыд важсьыс ён лои. Пырис керкаад, а сәні пөрысь пөч олө, тшаква панялө.

— Видза олан,— шыасис Шундыр.

— Пыр, пыр, бур мортөй, пуксьы да шойччы,— шуө пөчыд.— Дас во некод эз волы, дас во кильчөөй киссьөма.— Сәсся корис сөйны пызан дорө.

¹ Веркөвөй — вөрса олысь.

Пуксис Шундыр, паняліс тшаква.

— Кутшөм могөн нө ветлөдлан?— юасьö пöч.

— Вöрсаөс көсья аддзöдлыны.

— Ме ог тöд, көні Вöрсаыс олö, а менам ыджыдджык чой эм, гашкö, сійö тöдö. Сета ме тэныд тупыль, сы бöрся и вöтчы.

Муніс Шундыр тупыль бöрся. Муніс да муніс, бара керка аддзис, воддзасьыс важджык, весиг öдзöсыс вежыньтчöма. Тутш-тотш вöчис Шундыр, грым-грам ладмöдіс, дзирлик-дзурлик лöсьöдіс — öдзöсыд важсьыс бур лои. Пырис Шундыр керкаö, а сэні пöч пукалö, воддзасьыс пöрысьджык, пувъя ва панялö.

— Видза олан,— шыасис Шундыр.

— Пыр, пыр, бур морт. Дас во некод ме ордö эз волы, дас во öдзöсöй вежыньтчöма. Пуксьы да панясь.

Пуксис Шундыр, паняліс пувъя ва, сэсья и юалö:

— Пöчö, он-ö тöд, көні Вöрса олö?

— Ме эськö ог тöд, да, гашкö, менам ыджыдджык чой тöдö. Сета ме тэныд тупыль, сы бöрся и вöтчы.

Муніс, муніс Шундыр тупыль бöрся да аддзис ты. Ты бокас пöлынтьчöм важсьыс-важ ичöтик керка сулалö. Шундыр дыр эз мөвпав: тутш-тотш вöчис, грым-грам ладмöдіс, дзирлик-дзурлик лöсьöдіс, керкаыд туис кодь веськыд лои. Пырис Шундыр керкаö, пöрысьсьыс-пöрысь пöч пукалö, туруна ва панялö. Чужöмас чуқыр вылын чуқыр, кийс тіралö, юрыс дзөрö.

— Видза олан,— шыасис зонка.

— Пыр да пуксьы, бур мортö,— тшöктіс пöч.— Дас во некод ме ордö эз волы, дас во нин керкаöй пöлынтьчöма.

Пуксис Шундыр, туруна ва паняліс да и юалö:

— Мыйла нö туруна ва сёян?

— Тшаксö да вотөссö ог нин аддзы корсявны. А тэ нö эськö кутшөм могөн ветлөдлан?

— Вöрсакöд кöсъя аддзысьлыны. Он-ö тöд, кöни сійö олö?

— Тöда,— пöчыд вочавидзö,— ты саяс. Эн мун сы дорö, бур мортö. Сійö öд немортö вермас тэнö вöчны, либö сідз ылöдлас, вöрсьыс петан туйсö он аддзы, нэмтö вöртиыс гöгрöдлас.

— Ме ог пов,— шуö Шундыр.— Ветла. Сы ылнаöдз нин вои да.

Петіс Шундыр туйö, но жаль лои пöрысь пöчыд, да кежис вöрас, вотіс юр тупкöдас чöд, тшак чукöртиштіс, пыртіс пöчылды. Нимкодъ лои пöчылды, синваыс дзöлквидзö син дорышас, аттьöалö Шундырöс, муса пиөн ыдждöдлö. Петігас нин содтöд горöдіс:

— Вöрсаыд гильöдöмысь полö.

Мöдöдчис Шундыр Вöрса дорö, гөгöртис тысö, ты дор мозыс ватшетшак¹ сярвидзö, аддзис дзоляник, но ён ниа керъясысь лэптöм керка. Керкаыс сыркакылö: Вöрсаыд узьö вөлöм да татшöм гораа шкоргö. Ыджыд да ён Вöрсаыд, тошка да гöна. Вуньки-веньки сибöдчис Шундыр да и гильöдыштіс коклябöрсö. Чужйис Вöрсаыд да бара водзö узьö. Шундыр бара гильöдыштіс кок пыдöссö. Вöрса пуксис, гыжъясьыштіс да бара водіс. Зонка гöна киняувсö гильöдыштіс. Ыджыда вом тырнас серöктіс Вöрсаыд. Бара гильöдыштіс: быттьö гымыштіс, сэтшöм гораа серöктіс пöрысьыс. Шундырыд весиг весьöпөрліс. Сэссия бара босьтчис гильöдчыны, öдъялі да гильöдö и гильöдö: Вöрсаыд йиджмасьö да сералö. Дугдывтöг гильöдö Шундыр, Вöрсаыд нин öтторъя серамысла сьöмді, бергалö, быглясьö, чужъясьö. Лолыс нин тырны мöдіс.

— Ой, дугды, ой, дугды,— горзö.— Коді тэ, висьтась, мый коран, сійöс и сета.

Дугдіс зонка гильöдчынытö. Упкö сöмын Вöрсаыд, лов шысö лөньöдö.

¹ Ватшетшак — кувшинка.

— Эн вунод, мый көсыйсин?— юалө Шундыр.

Чөв олө Вөрсаыд, мөвпалө, коді эськө тайө вермас лоны: ачыс оз тыдав, а гильөдчыны кужө. Мый пө талы колө?

Эз кыв вочакывсө Шундыр да бара мөдіс гильөдны. Вөрса ойзө:

— Дугды, дугды, мый колө, сійөс и сета.

Эновтчис Шундыр.

— Коді нө тэ лоан?— юалө Вөрса.

— Шундыр.

— Эг кывлы татшөм нимсө.

— Ме ылысь вои.

— Мый нө эськө тэныд колө?

— Ме ачым дзоля, кыйсьыны ог вермы, айө пөрысьмис. Меным кыйдөс колө, мед ай-мам тшыглы эз кувны.

— Ты мөдарас воливлы,— шуө,— воан да горөд: «Месай, кыйдөсла вои». Лоө тэныд ур да пөтка. Таладорас кө вуджан — немтор тэныд оз ло.

— Öні вуджа ты мөдарас да горөда. Оз кө кыйдөсыд ло, бөр локта да кувтөдзыд гильөда,— шуө Шундыр.

— Кыдз шуи, сідзи и лоө, сөмын мун татысь,— ыстө Вөрса.

Вуджис Шундыр берег пөлөн ты мөдарас, босьтис кос ув, кучкис пожөм пуө да горөдіс:

— Месай, кыйдөсла вои.

Сөмын тадз шуис: сьөлаыд да тарыд вылысас пуксьөны. Босьтис пөткатө нумөн, тэчис ноппө. Гоз-мөд сьөла пөрысь пөчлы пыртис. Вөрсьыс лэччигмозыс на кыкнан чойыслы юкыштіс пөткасө. Коркө и гортас воис. Ай-мамыс ёна нин шогсьөмаось: бара Шундыр вошөма. Сэтчөдз шогсьөмаось, весиг вынныс абу пач ломтыны.

Шундыр пач ломтіс, пуис яя шыд, вердіс пөрысь гозьяос.

Тадзи и мөдiсны овны да вивны. Чери окота лоо сөйыштны, петалас Шундыр ю дорө, горөдас:

— Васа, черитө вай!

Кельөбөн воас Шундыр весьтө чериыд, мөдыс сөмын гумовтас уна-ө колө.

Окота лоо пөтка яя шыдөн чөсмасьыштны, кайлас вөрө төдса ты дорө да ноп тыр кыйдөс лэччөдас. Пөрысь чойясөс тшөтш гөститөдас ветлиг-мунигмозыс: кайигас — чериөн, лэччигас — пөткаөн. А тшак ваявны да пув вотны Шундыр ачыс зиль.

Олисны-вылисны тадз пөрысь гозъя да Шундыр, да коркө-некоркө налөн совныс бырө. Дуб чери-пөткаыд вомас оз пыр. Шогсьөны пөрысь гозъя: колө кыськө сов судзөдны.

Пөль мөдiс лөсьөдчыны карөдз кывтлыны, ярманга вылысь сов ньөбны. Пыжсө путкыльтiс да бура сиралис: ыли туяд петигөн колө лючки-бура дасьтыны. Öти сепысө тэчис кос чери, мөдө — кос яй, коймөдө — дона звер куяс.

Шундыр айыслы вөзйысьө:

— Босьтлы менө, айө, карсө видзөдлыны.

— Ог босьт тэнө, пиук,— шуө батъыс,— ва туйыс кузь, вöян кытчөкө либө бара ваад чеччыштан.

— Ог, айө, ог чеччышт. Лөня пыжад пукала. Босьтлы менө, айө, ярмангасө видзөдлыны,— бара вөзйысьө зонка.

— Ог босьт, пиө, карас зэв уна йөзыс, ярманга дырйиыс нөшта уна, талаясны тэнө сэни, дзолятө.

— Айө, ог вош некытчө, босьтлы менө ярмангасө видзөдлыны,— коймөдысь вөзйысьө Шундыр,— петкөдлы меным, көни совсө вузалөны. Гашкө, коркө тэ ёна пөрысьман да он вермы ветлынытө, а меным өтнамлы сэсса оз сюр.

— Ветлам инө.

Босьтіс айыс Шундырөс карө. Сөвтчисны пыжө, йөткыштчисны крут кыркөтшысь да и мөдөдчисны.

Дживгө-кывтө пыжыс ю кузя, айыс сынө, пиыс бөрас пукалө да бөжалө. Лун кывтісны да и мөдөс, Паль юысь Печера юө петісны (войнас бипур дорын узисны), коркө-некоркө джуджыд чой йылын, керьяса стын сайын кар тыдовтчис. Матыстчисны: ю дор мозыс пыжыс лыдтөм-тшөттөм; ярманга вощьөма, уна йөз воөма.

Кайисны карө. Шундыр юрсө сөмын бергөдлө, гоньялө-видзөдалө гөгөр: медводдзаысь на воис да. Гөгөр кык судтаа мича керкаяс, джуджыд кильчөаөсь, серөдлөм өшинь дорьясаөсь. Ярмангаас сярвидзө төварыс. Öтилаян пу көлуйөн вузасьоны: пельса да ватлан, чуман да яндөва. Мөдлаын көрта көлуй: чер да пурт, чарла да коса. Коймөдлаын сөян да юан: чери, пөтка-яй, тшак да вотөс. Нельөдлаын — пода.¹

А йөзыс! Вөрын пуяс мында. Ветлөдлө Шундыр батъыслы гач кокас кутчысьөмөн. Вомыс пась. Сувтісны найө өтилаө, вузалісны чери да яй, зверь куяс. Мунісны сов ньөбны. Туис тыр кизьөр сов босьтісны.

— Но,— шуө батъыс,— ньөбам тэныд көлач вөнь, энъыдлы гөснеч — преник да кытчөкө узьмөдчам. Асыв туйө петам.— Аслыс зэв любө — Шундырыд эз вош да.

Вөзйысисны өти керкаө узьны, дзор юрсиа пөч өтнас олө, лэдзис найөс. Гөститөдісны Дзоруктө ярманга вылысь ньөбөм көлач-преникөн, да варовмис пөчыд, быдторсө юасыны пондіс:

— Тайө нө ичөтик зонкасө мыйла татчөдз вайин?

— Арлыд сертиыс өд абу ичөт,— висьталө пөль,— пөрнөй зон нин эськө вөлі, тушанас кө быдмис. А со оз быдмы.

¹ *Пода* — скөт.

— Вомдзалёмаось... — шуё пöчыс. — Менам эськө вöліны вомидзсө вештысь горадзульяс¹, да ог вот тöд, кöні найö.

— Кодкө нö гусяліс али мый? — юалö Шундыр.

— Эз эськө гусявны да, ачым сеті.

И висьталіс пöрысь пöчыд со мый. Коркө важөн-сьыс-важөн овлөма-вывлөма тайö карас купеч, озыр морт, вөлөма сылөн куим ныв. Сылысь нывъяссö и быдтөма-чеченитөма тайö пöрысь пöчыд, дерт, сэк сійö томджык на вöлі. Гöтырыс купечыдлөн бара нөбасьны кутас, чужтас пиос да и кулө. Ёна жалитас гöтырсö купечыд, зэв ёна радейтö вөлөм, а сэсся став асьыс радейтөмсö нывъяс вылас вуджодас. Сідз мөдас найос лелькуйтны — син увсьыс оз лэдзлы. Ни йоз син водзö оз петкөдлы.

Коркө-некоркө и шөвктуг кодь нывъясыд быдмасыны. Медыджыдыс, Марпида, нылалан арлыдөдз воис. Кывсьөма йөзыдлы асья кыа кодь мичаник нывъяс йывсьыд, мөдөмаось корасысьяс воывлыны. Айныслөн век öти вочакыв: верос сайö пö некодос ог сет, мед мамыс моз кага вайигөн оз кувсьыны. Ыджыд нылыд коркө батыслы и воча шуас, ме пö пета верос саяд. Сэтшөма батыс скөрмөма, вирыс пузьөма, юр вемыс торксьөма. Корөма сійö лёк керысь тунос да тшөктөма: дзеб пö менсьым нывъясөс сэтшөминö, мед ни öти зон найос оз адзыв.

Туныд мөдас нимкыв лыддыны, а кага видзысь-лелькуйтысь пöчыд зэв öдйö суйыштас быдөнлы морт öтиөн горадзульястө. Вошөмаось нывъясыд керкасьыс. Көнось — некод оз төд. Айыс нывъяс вошөм бөрад сэтшөма шогсяс, висьмас да кулө. Писö бокөвöй йоз быдтасыны, гашкө, оз и төд, мый сылөн куим чой көнкө вийим. Öні пö ачыс нин зэв озыр, куим пөв озырджык батысьыс.

¹ Горадзуль — бубенчик.

— Пөчөй, а кытысь нө тэныд горадзульясыс?— юасьö висьтасьöм бöрас Шундыр.

— Горадзульяссö меным аслам пөчөй сетлис, висьталис, куимнансö кө пö öтлаын ворсöдан — став вомидзыс пусь-пасьмунö. Век аскöд и види, мед менö некод оз вомдзав, а сэки вот нывъясыд жальöсь меным лоины да сеті. Гөгөрвоасны кө найö öттшöтш ворсны горадзульнас, сэки и лёк тунлөн нимкывйысь мездмасны.

— Пөчөй, а мыйла нө тэ вокныслы он висьтав чойяс йывсьыс?— шызьöма Шундыр.

— Коркө көсьи пыравны, да менö матö керкаас эз лэдзны. Көнi менам быдтасьясöй, шöвктугъясöй, öнөдз ог тöд,— шогпырысь шуис пöч да мөдiс вольсасьны, лөсьöдчис водтöдны узыны туй йöзöс.

— Öти горадзулльыслөн выныс абу ыджыд, а куимнансö кө чукөртан да öттшöтш тильгыны мөдан — став вомидзыс и лёкыс вошö,— бара на содтiс пöчыд.

Шундыр айыскöд пöлатын узис, пöчыд — паччöрын.

Асьявыв петiсны гортлань туйö. Ва катчöстö сьöкыдджык вöли сыннытö, унджыкысь ковмис сувтлыны шойчыны, но коркө-некоркө воисны жö гортаныс. Мамныс бура жö горт олöма натöг.

А Шундыр лун и вой мөвпалö куим чой йылысь, некыз оз вун пöрысь пöчлөн висьтыс.

Кайис Шундыр вөрö, гөстиндзи босьтiс куим пöрысь чойлы: көлач да преник, а дозмукин — ма. Воис ичöt чойыс дорö, гөстиндзисö пызан вылö тэчис.

А пöчыс и шуö:

— Ой, кутшöм чöскыдторъяс тэ, Шундыр, вайöмыд! Челядьдырсянь татшöмсö эг сөйлы.

— А тэнад эм абу горадзуль?— юалö Шундыр.

— Эм,— шуö пöрысь пöч.— Со,— босьтiс джаджйысь да петкөдлис. Гөгрöс пу кольчаö зэвтöма кучик, а доръясас öшйöдлöма зэв ичötик тильгунъяс.

— А тэнад ыджыдджык чойясыдлөн эмось абу татшөм горадзулясыс?— чачасө киас бергөдлігмоз водзө юасьö Шундыр.

— Ог төд. Ми өд өта-мөдкөд ог волысьö.

— Вай тайөс босьтам да ветлам мөд чой ордад,— вөзйö Шундыр.

— Ог, ог, меным оз позь!— повзис пөчыд.

— Позьö! Мөдім!— мырдөн сорөн нуөдіс Шундыр.

Воисны найö шөркост чой ордас. Юалисны, эм-ö сылөн горадзуль.

— Эм,— шуö. Петкөдліс. Кык горадзуллыыс дзык өткодьöсь.

— Ветлам медыджыд чой дорад,— нуөдчö Шундыр.

— Ог, ог, миянлы оз позь,— пыксьöны пөчьяс.

— Ветлам, ветлам,— бара мырдөн Шундыр нуөдіс.

Воисны медыджыд чой дорас. Горадзуллыыд и сылөн эм.

— Ноко, чойяс,— шуö Шундыр,— вайö өттшөтш ставныд тінгөй горадзульнад. Да эн шензьöй, мый лоас,— ачыс на тырвыйö оз эскы зонкаыд, сы вöсна чойяслы нинөм эз и висьтав водзвывсö, гашкө, абу на и вомидз вештан чачаяс да.

Мөдісны тінгыны өтпырйö куим чой, да здукөн том-мисны, мичасьыс-мичаөсь лоисны, чукыр вез ни дзор сi эз коль налөн.

Шензьöны, өта-мөд вылас видзөдöны, мый нö пö тайö микөд лои. Шундырлысь көсйöны юавны, а Шундырыд кытчөкө вошöма. Некөн абу. Горзöны — оз шыась. Сöмын орласьöм паськөмыс кольöма.

А Шундырыд ачыс шөйөвошöма, оз төд, мый и вöчны. Кор чойяс мөдісны зильгыны горадзульнад, Шундыр мед-водз казяліс, мый сы вылысь паськөмыс мөдіс трачка-кывны-потны, сэссия лецöбөн-лецöбөн гылаліс джоджö. Шундырыд öти здукөн быдмис. Вөлөмкө, куим тільгу-

ныдлөн выныс зэв ыджыд, зонка вывсьыд вомидзыд тшөтш вешйöма.

Шундыр син бöжнас казяліс, кутшöм мичаöсь лоисны чойяс, да котөрөн петіс керкаысь, мед пасьтöгыд сійöс нывъясыд оз аддзывны.

Котөртіс Шундыр да дзевсис пуяс сайö. Мый и вöчны? Öнi öд чойяссö ковмас сиктö лэччöдны, а пасьтöг на дорö матыстчыны — юр яндзим.

Казьтыштіс Шундыр Вöрса йылысь, котөртіс сы дорö. — Вöрса, Вöрса! Шыбит кутшöмкö пасьшой. Сэсся ме кыйдöсыдла тэ дорö ог нин волю, ме öнi ачым лои ыджыд да ён, ме ачым кыя!

Шыбитіс Вöрса важ пасьшой. Гаровтчис сэтчö Шундыр да котөртіс чойяс дорö. А чойяс сыысь повзисны, яндысьöны: ыджыд мича зонтö öд синнаныс на эз аддзывны.

Висьталіс налы ставсö Шундыр, и шуисны чойяс лэччыны сиктö, а сэсся Шундыр кöсйысис найöс кылöдны пыжөн карöдз.

Лэччисны сиктö, а Шундыртö мам-батьыд оз тöдны. Кыдз вермис, висьталіс налы ставсö. Мöдісны артавнымуртавны, кодi нö эськö вермис Шундыртö пузчужöм каганас вомдзавны? Гöгиньыс!? Муніс Шундыр сы ордö, а мöдыс аддзис ыджыд мича зонтö да ставсö гөгөрвоис, уськөдчис пидзöс вылас да мöдіс кевмысьны:

— Эн ви менö, Шундыр!

— Мыйысь нö тэ менö вомдзалін?

— Батьтö радейтли, да эз ме вылö гөтрась. Со и вомдзалі, мед челядыс налөн эз чуж. А тэнö со Енмыс сетіс, да вомдзалі, мед он быдмы.

— Ок, кутшöм тэ лёк вөлöмыд. Вины и колö эськö тэнö да,— ырыштчис Шундыр.

— Прöстит, прöстит менö,— кевмысьö гöгиньыс.

— Прöстита, инö,— шуö Шундыр,— сöмын вур ме-

ным да куим чойлы, кодъясös ме лэччöдi вöрсыйс, выль паськöм. Куим лун мысти воа. Да вомидз кывтö вунöд!

Олісны-вылісны куим чой Шундыр ордын. Медводз, дерт, пывсисны-мыссисны, важ ротйысьöм паськöмсö сотісны, Шундыр мамлысь сöстöм дөрöмъяссö пасьтавлісны, а сэссия Шундыр вайис налы мича сосьяс¹ да сарапанъяс.

Вöччисны нывъяс — веж петкöдлöны, сэтшöм мичаöсь. Шундыр ёна жö мича да статя.

Лöсьöдчисны туйö петны. Нурьясянтор, черинянь да кöвдумъяс, тэчисны пыжö, вöрзисны. Кывтöны дзöлкöс пыжөн, сьölöмъяснас кыпъялöны, виччысьöны, кутшöм олöм налөн водзö лоö.

Паль ютi кывтісны, сэссия Печера юö петісны. А пасьтаыс! А мичыс! Нывъяс-чойяс неқор на ю вывтi абу кывтлöмаöсь да весиг польштöны.

Коркö-некоркö и уна йöза кар мыччысис. Воисны. Чойяслы ставыс выль, ставыс шензьöг. Нуöдiс найöс Шундыр Дзорук пöч дорö. Пöчыд öд тöдiс нывъястö: дзик пö мамныд кодьöсь.

Пукалісны-варовитісны, кызди нö эськö вокныс дорö мунны. Сибöдас оз, кывліс-ö на йылысь? Пöчыд шуö, ме пö ветлі, да öдзöсöдыс пырныс эз лэдзны. Шундыр шуö:

— Öдзöсöдыс эз лэдзны, öшиньöдыс пырам.

Мунісны. Дзор пöч медводзын, сэссия Шундыр, сэссия öта-мöд бöрсяыс чойяс. Воисны зэв джуджыд кык судта керка дорö. Уліас лавка. Лавка пыр керкаö пырны оз лэдзны. Гөгортісны — гөгөр тшем джуджыд стын, коластор некөн абу. Дзирьяыс пöдса. Кольчаөн голь-голь вöчисны — некод оз восьт. Сöмын понъяс лёкысь увтчöны.

¹ Сос — сарапан улын новлан ковта.

— Ковмас, инö, öшиньтыыс пырны,— шуö Шундыр, збой зон, ур кодь пельк, некодысь оз пов.— Сöмын вайлö меным куимнан горадульсö.— Тасма костас кöлалис горадульяссö да стен дортыыс джуджыд стын вылас кай-ис, а сэтысянь öшиньöдзыс судзöдчис, восьтис öшинь ставсö, кияс вылас лыбöдчис да пырис. Медводдза жыр-ьяс некод абу. Мöд жыръяс том зон пукалö.

— Тэ месайыс¹ тани?— юалö Шундыр.

— Ме! А тэ кодi? Кытысь татчö усин?— зэв скөр том мортыд, чужöмыс зэлалöма, синмыс сувтса, тайкö пон моз пурны уськöдчас.

— Ме уси енэжсьыс, мед тэныд висьтавны, мый тэ-над эм куим чой.

— Эн сөр! Пет, мун татысь!— мöдiс лёкысь горзыны том зонмыд.

— Эн тэрмась да кывзы менö,— шуö Шундыр. И сийö висьталiс Дзорук пöч йылысь, вöрын олысь куим чой йылысь, горадульяс йылысь. Висьталiгмозыс кыс-кис горадульяссö да мöдiс тiньöдны найöс.

Видзöдö, да том зонмыдлөн чужöмыс небзыны мöдiс, горадуль шы улад вежсис, бур синвидзöдласа лои. Вылö пуксьöмыс кытчöкö лэбовтiс, морт ногөн нин шыасис Шундыр дорад.

— Менам эм куим чой? Ме кöсья найöс аддзöдлыны. Көнöсь найö?

— Потшöс саяд виччысьöны,— висьталö Шундыр.

Корис веръяссö², ыстiс найöс ывлаö, тшöктiс домны понъяссö да восьтыны дзиръясö.

Пырисны чойяс, кутчысьлисны вокыскöд, а сэсея сёр-ни да басни. Пызан восьтiсны, а пызан вылас сё сорва. Медся ыджыд гöсьтъясөн лоины Шундыр да Дзорук пöч.

¹ Месай — кöзяин.

² Вер — слуга.

Куим лун гөститисны. Сэсса Шундыр и шуо:

— Мунан кад менам воис, асыв туйо пета.— И юалө меддзоля чойыслысь:— Петан-ө ме сайо верос сайо? Мунам менам сикто, лэпта ме татшом жо кык судта керка, мода кыйны уна чери, уна потка.

Көсйысис меддзоля чойыс мунны Шундыркөд. Мукөдыс кольччисны овны вок ордас, на дорын тшотш и Дзорук почыд. Купеч пиыд зэв бур лои, ставос видзо, быдонлы модис отсасыны.

Шундыр кызди көсйис, сидзи и вочис. Лэптис кык судта выль джуджыд керка. Овны да вывны модисны шуда том гозья, челядь налон чужи. Бать-мамсо динас босьтисны. Кывсылис налы, кык ыджыдджык чойыс верос сайо жо петомаось, купеч пьян сайо. Бура по олоны.



ЮРИНДАЛЫСЬ

Вова да мукöд (<i>повесът</i>)	3
Лöз клянича (<i>висътгяс</i>)	42
Мороз Пöльлөн козин	42
Мойдчöм	44
Уськöдлысь лызь	45
Повзьöдчысь	47
Ошлы — нитш пинь	48
Лöз клянича	50
Кысук асныралö	52
Агния баб — волшебник	55
Чошöяслы пöлать	58
Кодзувкотгяс	60
Шундыр (<i>мойд</i>)	63



*Литературно-художественное издание
для детей младшего школьного возраста*

*Елена Васильевна Козлова
(Ветошкина)*

ШУНДЫР

Повесть, рассказы, сказка

На коми языке

Художник А.Б.Минченкова

Дизайн обложки — В.Б. Осипов

Редактор В.И.Трошева

Художественный редактор В.В.Осипов

Компьютерная верстка — З.А.Поздеева

Подписано в печать 11.09.07. Формат 70×100¹/₁₆

Бумага офс. Печать офс. Усл.-печ. л. 7,1

Уч.-изд. л. 6,5. Тираж 1000 экз. Заказ 28037

ООО «Анбур». 167982, г. Сыктывкар, ул. Карла Маркса, 229

Отпечатано в ООО «Коми республиканская типография»

167982, г. Сыктывкар, ул. Савина, 81



Козлова Елена Васильевна чужис 1954-öd вося февраль 14-öd луно Ёмдин районса Лыаты сиктын. Помалис Туискерёсса шөр школа да Коми пединститут. Уджавліс детсадйын, школаын, Коми наука шөринын. Öні веськөдлө Коми Республикаса гижысь котырөн.

Елена Васильевна гижö медсясö челядьлы. Йöзöдліс «Лöз клянича», «Ме да Ивук вокöй», «Лым морт», «Гöгыля-вугыля» да роч кыв вылын «Синее стёклышко» небöгъяс. Роч кывйысь кындзи, гижöдь-яссö вуджöдлісны эст, финн да Россияса мукöд войтырлөн кывъяс вылö.

Олö Сыктывкарын.

